

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi

1 ¹Xanë Pablonë, Jesucristo pijajivitonënë. Dioso nejunata. Nexata nitoroba apóstolenënexanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

²Bajayata vajavajënaeya, Dioso bajarapalivaisi tajëvelia yapëtaeyae-xana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaxanatsi bajarapapexanialivaisi. ³Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvë-nëvata naexana. Bajaraponë, Davidpijinë, bajayata Israelnacua pepo pevetsinëmi. ⁴Vajatuxanenë Jesucristo petëpaecujinae, Espíritu Santo icatsia asaëyaexanatsi. Bajarapacuenia piasaëyaexanaexaetsi petëpaecujinae, jivi yapëtanetsi Dioso pexënatocuene. Yapëtanetsinua piasaë-nëcuene ata. ⁵Jesucristo pejamatabëcueneta Dioso paneitoroba saica-ya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonae apo judíovijava, apo judíovi ata pejumecovënëtsinexa Dioso.

⁶Nexata paxamë ata Roma tomarata panejinavanapaevi pajumecovë-nëtame baja Dioso. Tsipaji paxamë ata Dioso pacajunata Jesucristo papijajivinexamë.

⁷Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinexamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexanua.

**Pacuenia picani Pablo bitso jamatabètane
Roma tomarapijivi yabara pelivaisi**

⁸Namataxainaeya pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapa-cueniaje: “Sivajamatabècuenegarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tsipaji daxitanacua-nëpijivi pacavajunupaeba xaniavaetsia panejumecovënëtavanapaejava Dioso. ⁹Xanë daxita tajamatabècuenesaëta Dioso pijacuene tonacuene-baponaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapètane patacatovajëtabiabijava itsa pacanajamatabëna-pitabiabatsi tavajëtsijavata Diosojavabelia. ¹⁰Vajëtabiabajë Diosojavabelia taponaenexa paxamëjavabelia. Nexata Dioso itsa netocopatsiana tapo-naenexa, ponaenajë paxamëjavabelia. Bajayajebi picani bitso jamatabë-ponabiabajë patacataenexa. ¹¹Nexata jitsipajë patacataenexa, patacatsi-paebinxanua palivaisi Espíritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabècuenesaëmë tsaponae tsane orijibia Diosojavabelia. ¹²Namataenetsia najamatabècueneyavenonaenatsi Dioso pejumelivaisi vajajumecovënëtsijava. Pacayavenonaenatsi paneja-matabècuenesaënexa Diosojavabelia. Paxamë ata juya paneyavenonaena-me bajarapacuenia.

¹³Tajamonaë, pacatojitsipatsi paneyapëtaenexa mapacuenije. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponaenexa. Jitsipajë patacatsipaebinxaxa Jesucristo pelivaisi paxamëyajuvënëvi, pamonaë abaxë apo jumecovë-nëtsi, pejumecovënëtsinexa Jesucristo. Pamonaë ata baja jumecovënëta, Jesucristo piamatabècuenesaënexa pevajënaeyabelia. Pacuenia apo judíovi ata jumecovënëtapona pevajënaeyabelia itsaxuayo tsipaebana-jetarucajë, bajara paneitsinexa paxamë ata. ¹⁴Dioso nitoroba tatsipae-baponaenexa Dioso pejumelivaisi daxitajivijava. Nexata Dioso pejume-livaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyaëtaevijava ata, apo peya-pëtaevijava ata. ¹⁵Bajaraxuata bitso jitsipajë paxamë, Roma tomarata panejinavanapaevi ata, patacatsipaebinxaxa pexanialivaisi.

**Pacuenia pexanialivaisi, Jesucristo pelivaisi, pinijisaë
xaina ayaicuene pexanaenexa yabara pelivaisi**

¹⁶Apo ajumeuranë tsabiabi jivi tatsipaebabiabijava pexanialivai-si, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabècueneta pijaneconi vecuaajibiaexa-naenatsi pajivi jumecovënëta bajarapalivaisi. Copiaya patsipaebaponajë

bajarapalivaisi judíovi. Bajaraxuacujinae icatsia cotocaevi patsipaebapona-jê apo judíovi. ¹⁷Bajarapalivaisi nacayapêtaeyaxana pacuenia Dioso nacatoexana aneconijibia Dioso vajanacataenexa. Aneconijibia baja Dioso nacatane Jesucristojavabelia vajavajënaeyabelia vajanajamatabëcuene copataponaxae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanê pepacuene Dioso neyavenonaena pacuenia najumecapanepaeya jumaitsi,’ jamatabëjai, bajarapajivi Dioso aneconijibia tanetsi. Bajarapajivi xainaena matacabi pevereverecaajava,” jai Dioso pejumelivaisibaxutota.

**Pacuenia daxitatsi mapanacuapijivitsi naneconitatsi
Diosojavabelia yabara pelivaisi**

¹⁸Dioso, athëbëtatsia peecaenê, vaxaitsi jamatabëcueneyapëtanetsi. Yapëtanetsi mapacueniaje. Dioso baraanaepanapona daxita pibisiacue-ne pexanaevijavabelia. Bajarapamonae pevajënaeyabelia pibisiacue-ne pejamatabëexanaexae, apo jitsipae pejumecovënëtsinexa pexaniajai-livaisi, Dioso pejumelivaisi. ¹⁹Bajarapamonae xaniavaetsia beyapëta-ne picani pacuenia Dioso jamatabëcueneitsi. Tsipaji baja picani Dioso tsitanajamatabëcueneitajëta bajarapamonaejavabelia. ²⁰Jivi apo caë-jëpaetsi pitaxutota petænexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcueneitsi. Caëjëpatsi picani peyapëtaenexanua daxitamatacabijavabelianexa Dioso bitso piasaëtsaponaponaejava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaejavanê mapanacuataje. Nexata bajarapamonae acuenebi pejumaitsinexa: “Apo payapëtaenê cajena pacuenia Dioso jamatabëcueneitsi,” pejainexa. ²¹Bajarapamonae yapëtae ata Dioso peponaponaejava, itsiata apo yaiyatae. Caeto ata cajena Diosojavabelia pexaniajamatabëcuene apo rajutsi. “Pexaniacuene rabaja panetoexaname,” apo jai. Biji saya caranata ênatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcueneita-quiri tsaponae. ²²Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baitsi jane cajena apo yapëtae. ²³Bajarapamonae apo najamatabëcueneocopabi ayaijamatabëcuene-nê Diosojavabelia, ponê apo petëpaenënexa daxitamatacabijavabeliane-xa. Caranata saya jivi pecobeta jumapecataeya pexanaenëanëjavabelia najamatabëcueneocopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro



Jivi navajēcabiaba jumapecataeya pexanaenējavabelia (Rom 1.23)

pataxutabeje pejinavanapaevi jumapecataeya pexanaenēanējavabelia ata.

²⁴Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabēexana, exanavanapa. Nexata bajarapamonae pevitota pibisiacuene namataenetsia natoexanabiaba. ²⁵Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabējumecovēnētsi. Jumecovēnēta saya caranata penajumetsēnētsilivaisi, jivi pecobeta jumapecataeya pexanaenēanē pelivaisi. Bajarapamonae apo yaiyatae pepo Dioso, ponē daxitacuene exana mapanacuataje. Caranata yaiyataeya navajēcabiaba Dioso pecobecovējavanējavabelia. Najamatabēcuenecopabanua ēbajaraxuanējavabelia. Bajarapamonae nexata saya namuxujemata caranata pepo Dioso, ponējavabelia jivi daxitamatacabijavabelianexa jumaitsijitsia: “Diosomē, bitso ayaijamatabēcuenenēmē,” jaijitsia. Bajara itsi tsane.

²⁶Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabēexana, exanavanapa. Mapanacuata picani

Dioso tocopata petiriavi pebi pejitsipaenexa. Itsiata baitsi jane bajara-pamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷Bajara pijinia pacuenia Dioso tocopata pebi-jivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsiexanaexae, Dioso ayaicuenia naneco-nitsiaexanaponatsi bajarapamonae.

²⁸Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainaenexa ëpibisiacue-ne pexanaejava. ²⁹Bajarapamonae exanavanapa bitso daxita pibisiacuene. Ëpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainaeyababiabanua itsamonae pecobecovë. Pibisiacuene jamatabëxainabiabanua itsamonaejavabelia. Cuenecaëbabiabanua itsamonae pexinaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Ëpamonae ata bitso naitoya tsabiabinua. ³⁰Bajarapamonae itsamonae pepëya pibisiacuenia najumetsënëtsia baracuaicuaijai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yayiataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayaijamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae ata pibisiacuene pexanaeyaxanaenexa. Bajarapamonae apo jumecovën;etabiabinua paxajivi, penajivi ata. ³¹Bajarapamonae apo jamatabëjumeyapëtaeyabiabinua caelivaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexanabinexa icatsia. Bajarapamonae apo itaxutotsoniataeyabiabinua itsajivi ata. ³²Bajarapamonae bitso xaniavaetsia yapëtane picani pacuenia Dioso itorobatsi pexanaenexa. Yapëtanenua picani Dioso penavecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orjibia sivabarëya tsabiabi itsamonae ata pibisiacuene itsa exana.

**Pacuenia itsamatacabi Dioso naneconitsiaexanaejitsia
pijaneconi pexinaeavi yabara pelivaisi**

2 ¹Paxamë pajudíovimë, pacatsipaebianatsi mapacueniaje. Pajudíovimë pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë

tsabiabi. Bajarapacuenia paxamë ita pajumaitsimë tsabiabi itsajivi yabara, nexata paxamë ata Dioso pacananeconitsiaexanaena. Tsipaji paxamë ata pibisiacuene paexaname bajarapacuenia ita pajumaitsimë tsabiabi itsajivi yabara. ²Yapëtanetsi baja cajena mapacueneje. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso ita naneconitsiaexanaena pibisiacuene pexanaevi, caejivi canacujitsia, paneconivajëto xaina, bajarapaneconivajëtota Dioso naneconitsiaexanaponaena. ³Bajara pijinia pacuenia paxamë ata pibisiacuene paexanabiabi atamë, pajumaitsimë tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamë tsabiabi. Bajara pijinia pacuenia paxamë ata bajarapitsipibisiacuene paneexanabiabixae, pëtsa pajamatabëjumaitsimë tsabiabi: “Vaxaitsi judíovitsi Dioso pija-jivixaetsi, apo nacananeconitsiaexanae tsane Dioso,” pajamatabëjamë pëtsa. Tsipaji Dioso naneconitsiaexanaena daxita pibisiacuene pexanaevi. ⁴Bepacanaëjëtame xaniavaetsia pacuenia Dioso jamatabëcueneitsi. Dioso cajena abaxë bepíjia apo naneconitsiaexanae pibisiacuene pexanaevi ata. Dioso raja abaxë jamatabëcueneevetaponapona pibisiacuene pexanaevi ata pevajëtsinexatsi pevecuaajibiaexanaenexa pijaneconi. Paxamë ata Dioso pacatojitsipa panecopabinexa pibisiacuene paneexanabiabijava, panenajamatabëcuene pënëyorotsinexa Diosojavabelia. Bajaraxuata abaxë Dioso pacaitaxutotsoniatane. ⁵Itsiaata paxamë pajamatabëcuene-tajamë bitso. Apo pajamatabëcopatsimë pibisiacuene paneexanaejava. Nexata ayaineconi panatoexanaponame panevajënaeyabelia. Nexata ayaicuenia Dioso pacananeconitsiaexanaena pamatacabi Dioso naneco-nitsiaexanaena daxita pijaneconi pexainaevi. ⁶Bajarapamatacabi Dioso naneconitsiaexanaponaena caejivi canacujitsia. Paneconivajëto natoexanaponapona ita abaxë asaë tsaponaponae mapanacuataje, bajarapaneconivajëtota Dioso caejivi canacujitsia naneconitsiaexanaponaena. ⁷Itsamonae jamatabëcueneenabiabatsi ëpexaniacuene pexanabiabinexa. Bajarapamonae jitsipabiabanua pejinavanapaenexa Dioso pijapenivenivenaenacuatsia. Jitsipabiabanua Dioso pesivajamatabëcuenebarëyanexatsi. Jitsipabiabanua pexainaenexa matacabi apo pevereverecaejava. Bajarapamonae Dioso rajutsianatsi matacabi apo pevereverecaejava. ⁸Itsamonae natojitsipa daxitacuene pexinaejava ëbajarapamonaenexa. Apo jumecovënëtsinua pexaniajailivaisi. Saya exanavanapa ëpibisiacuene. Bajarapamonae Dioso anaeya ayaicuenia naneconitsiaexanaenatsi. ⁹Daxitajivi pibisiacuene exana, judíovi, apo judíovi ata. Daxita bajarapamonae pibisiacuene pexanaexae, Dioso bejiobiaexanaenatsi. Bitso yana-jamatabëxainaenanua pijaneconi. ¹⁰Itsiaata baitsi jane daxita pamonae pexaniacuene pexanaevi, judíovi, apo judíovi ata, Dioso pijapenivenivenaenacuatsia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcueneexanepanaeya.

¹¹ Dioso itsa naneconitsiaexanaena daxita pijaneconi pexainaevi, najë-paeya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso naneconitsiaexanaponaena caejivi canacujitsia. ¹² Pamonaë apo judíovi, yapëtae ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi apo judíovi. Pamonaë judíovi, yapëtae ata pacuenia Dioso Moiséspijinëta penajumecopatsilivaisi jumaitsi pibisiacuene pexanaeyaniva, itsiata bajarapapibisiacuene exanavanapa. Nexata bajarapapibisiacuene pexanavanapaexae, Dioso naneconitsiaexanaenatsi judíovi. ¹³ Dioso raja judíovi aneconijibia apo tae saya jema judíovi peyapëtaejava yabara, palivaisi Dioso tonajumecopata Moiséspijinëta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijinëta petonajumecopatsilivaisita. ¹⁴ Pamonaë apo judíovi, apo tsipaebitsi Dioso Moiséspijinëta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijinëta penajumecopatsilivaisita. Apo judíovi apo muxujiobi atatsi, yapëtane pejamatabëëthëtota xua pexaniacuene pexanaenexa. Yapëtanenua xua ata pibisiacuene pexanaeyaniva. ¹⁵ Pamonaë pexaniacuene exanavanapa tsipaebinejevatsi Dioso Moiséspijinëta penajumecopatsilivaisi, bajarapamonaë exanavanapa pejamatabëëthëtota peyapëtaecuenia, pacuenia itorobatsi Dioso Moiséspijinëta penajumecopatsilivaisita. Daxita apo judíovi yapëtane pejamatabëëthëtota pexaniacuene pexanaenexa. Yapëtanenua xua pibisiacuene pexanaeyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaena muetsia daxitajivi pibisiacuene pexanavanapaeneconi yabara. Naneconitsiaexanaenanua papibisiacuene ata muetsia daxitajivi najamatabëxainavanapa yabara. Nexata bajarapamatacabi daxitajivi nayapëtaena Dioso penaneconitsiaexanaejavanexatsi muetsia pexanavanapaeneconi yabara. Bajarapacuenia jivi tsipaebaponajë Dioso pitorobilivaisi itsa tsipaebaponajë.

**Judíovi yabara, Dioso Moiséspijinëta
penajumecopatsilivaisi ata, yabara pelivaisi**

¹⁷ Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijinëta penajumecopatsilivaisi. Bajaraxuata Dioso nacacapanepaena. Dioso raja ëjudíovitsi vajaDioso,” pajamë tsabiabi. ¹⁸ Payapëtaneme baja cajena xua Dioso pacatojitsipa paneexanaenexa. Payapëtanemenua Dioso Moiséspijinëta penajumecopatsilivaisi. Bajaraxuata payapëtaneme xua pexaniacuene paneitapetsinexa paneexanavanapaenexa. ¹⁹ Pajamatabëjumaitsimënu tsabiabi: “Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetae

ata Dioso pejumelivaisi, abaxë apo pejumeyapëtaevi pexaniajailivaisicue-
ne. Vaxaitsi jamatabëcueneitayotsianatsi pamonaë piãjamatabëcueneita-
quirivi, Dioso pejumelivaisivecua saya pejinavanapaevi,” pajamatabëja-
mënua tsabiabi. ²⁰Pajamatabëjumaitsimënua tsabiabi: “Vaxaitsi cajena
nacacaëjëpa vajayapëtaeyaexanaenexa pamonaë abaxë apo yapëtae
pacuenia Dioso jamatabëcueneitsi. Nacacaëjëpanua vajayapëtaeyaexa-
naenexa pamonaë ata pejanajumecovënëtsivi Dioso. Nacacaëjëpa baja-
rapacuenia vajayapëtaeyaexanaenexa tsipaji yapëtanetsi pacuenia Dioso
jumaitsi Moiséspijinëta penajumecopatsilivaisita. Bajarapalivaisi pexania-
jailivaisi baja cajena. Yapëtaeyaexana pacuenia jivi exanaejitsia,” paja-
matabëjamë tsabiabi. ²¹Bajarapacuenia paxamë patsipaebabiabi atamë
itsamonaëjavabelia, itsiata paxamë ata apo paexanaemë bajarapacuenia.
“iPëtsa panacobetoxotame,” pajamë tsabiabi itsamonaëjavabelia. Itsiata
paxamë panacobetoxotabiabame. ²²“Pëtsa panaperabëquenetsiataneme
itsavajavabelia panijavajivivecua,” pajamë tsabiabi ata itsamonaëjaba-
belia, itsiata paxamë panaperabëquenetsiataeyabiabame itsavajavabe-
lia panijavajivivecua. Paxamë pajumaitsimë tsabiabi: “Jumapecataya
pexanaenëanëjavabelia penavajëcaecuene bitso abeje. Itsa pajonejitsipa-
me jumapecataeya pexanaenëanë penubenaebota, pacajamatabëcuene
bijianaëjitsipa,” pajamë tsabiabi. Itsiata paxamë pajoneyabiabame juma-
pecataeya pexanaenëanë penubenaebota penamatamotsijavanë, ofrenda-
cuenia pejebijavanë, panenacobetoxotabiabinexa. ²³Paxamë pajudíovimë
jivi picani patsipaebabiabame Dioso Moiséspijinëta penajumecopatsilivai-
si, bitso pexanepanaelivaisi. Itsiata paxamë ata apo pajumecovënëtsimë
bajarapalivaisi. Bajaraxuata jivi apo yaiyatae Dioso. ²⁴Bajara paneitsixae,
copiapata jane baja pacuenia baja cajena Dioso pejumelivaisibaxutota
tajëvelia pacavajunupaeba. Dioso pejumelivaisibaxutota tajëvelia itsa
pacavajunupaeba, jumaitsi paxamë yabara mapacueniaje: “Pamonaë apo
judíovi, pibisiacuenia Dioso baracuaicuajai tsane judíovi xaniavaetsia
apo petsitajinavanapaexae,” jai tajëvelia Dioso pejumelivaisibaxutota
paxamë Dioso apo panejumecovënëtsijavanexa yabara.

²⁵Paxamë pajudíovimë pabejivimë, pacaperabëcaucuba itsa abaxë
patsiquirinacuetoximë. Baitsi pacaboupipeperabëcaucuba. Bajarapacuenia
pacaperabëcaucuba panenayapëtaenexa Dioso papijajivicuenemë.
Bajarapacuenia pacatonamatamota matapania itsa pajumecovën;etavana-
pame Dioso Moiséspijinëta penajumecopatsilivaisi. Itsa apo pajumecovën-
nëtsimë tsipae Dioso Moiséspijinëta penajumecopatsilivaisi, papecape-
rabëcaucubivi ata, itsiata Dioso apo papijajivimë tsipae. ²⁶Pamonaë apo
judíovi ata, apo peperabëcaucubivi atatsi, pejumecovënëtanapaexae
pacuenia Dioso Moiséspijinëta penajumecopatsilivaisi itorobatsi, nexata
bajarapamonaë ata Dioso pijajivicuenia tanetsi. ²⁷Pamonaë apo judío-
vi, apo peperabëcaucubivi atatsi, itsiata pejumecovënëtanapaexae

Dioso Moiséspijinëta penajumecopatsilivaisi, bajarapamonae itsamatacabi pacaurabiana Diosojavabelia. Bajarapacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtae atamë, papecaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaenexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. ²⁹ Pajivi pepacuenie Dioso pijajivitonë, bajarapajivi peneta pejamatabëëthëtovetsina Dioso jumecovënëta. Pajivi pepacuenie Dioso pijajivitonë, bajarapajivi saya naniavelia apo perabëcaucutsitsi. Biji rajane pejamatabëëjëtota pejanajamatabëcuene rajutatsi Espíritu Santo. Bajarapajivi xua exanaponapona, exanaponapona Dioso pesivabarëyanexatsi. Bajaraxua apo exanaponaponae saya mapanacuaipijivi pesivabarëyanexatsi.

3 ¹ ¿Detsa xua judíovi xaina Diosojavabelia, pamonaie apo judíovivecua? ¿Detsa xua yabara toxanepanatsi Diosojavabelia ponë peperabëcaucutsinëtsi apo peperabëcaucutsinëtsivecua? ² Palivaisianë judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia. ³ Itsamonae judíovi apo jumecovënëtsi pacuenia Dioso najumecapanepaeya jumaitsi petoexanaenexatsi. Pëtsa bajarapacuenie yabara pajamatabëjumaitsimë mapacueniaje: “Dioso meta itsiata apo exanae tsane pacuenia picani najumecapanepaeya jumaitsi pexanaenexa. Tsipaji judíovi apo jumecovënëtsi,” pajamatabëjamë pëtsa Dioso yabara. ⁴ Dioso cajena apo penajumetsënëtsinë. Jivi rajane banajumetsënëta. Dioso pexaniajailivaisi jivijavabelia petsipaebabiabijava yabara, tajëvelia Dioso pejumelivaisibaxutota jumaitsi mapacueniaje:

Xamë Diosomë, pexaniajailivaisi jivijavabelia tsipaebabiabame.

Jivi cajumeaebi ata, itsiata daxitajivi peyapëtaenexa, xamë apo nenajumetsënëtsinë,

jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabëcueneitajëtsiana daxitajivi peyapëtaenexa Dioso apo pejitsipaenëcuene pibisiacuene pexanaejava. Bajaraxuata pamonaie naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinë tsipae: “Dioso pibisiacuene exana itsa naneconitsiaexana pijaneconi pexainaevi,” itsa janë tsipae, nexata jamatabëcuenenavëxaniabiaya jumaitsinë tsipae. Tsipaji Dioso itsa apo naneconitsiaexanae tsipae pijaneconi pexainaevi, Dioso apo najamatabëcueneitajëtsi tsipae pibisiacuene pexanaejava apo pejitsipaenëcuene. Nexata pacuenia Dioso apo pejumecovënëtsivi banajamatabëxaina, bajarapacuenia najamatabëxainaejitsipajë. ⁶ Tsipaji Dioso saya jema jivi

apo penaneconitsiaexanaenë. Itsa saya jema Dioso jivi naneconitsiaexanaejitsipa, apo naneconitsiaexanae tsipae ëpijaneconi pexainaevi. Nexata caejivi canacujitsia pibisiacuene pexanaeneconi yabara, paneconivajëto xainapona, bajarapaneconivajëtota Dioso apo naneconitsiaexanaponae tsipae.

⁷Itsamonae meta jamatabëcuenenavëxaniabiaya jumaitsi tsane mapacueniaje: “Daxitajivi pecanaëjëtsinexa Dioso apo penajumetsënëtsinëcuene, vaxaitsi yamaxëitojorobiaya jivi livaisi tsipaebabiabianatsi. Bajarapacuenia yamaxëitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanae tsane. Tsipaji vaxaitsi yamaxëitojorobiaya jivi livaisi vajatsipaebabiabijava pejamatabëcueneta, daxitajivi canaëjëtsiana Dioso bitso pexaniajainëcuene, apo penajumetsënëtsinëcuene. Bajaraxuata Dioso apo nacananeconitsiaexanae tsane vajanajumetsënëtabiabiaya yabara,” jai meta tsane itsamonae jamatabëcuenenavëxaniabiaya. ⁸Bajarapacuenia itsa najamatabëxainaena bajarapamonae, nexata meta jamatabëcuenenavëxaniabiaya mataropotsia jumaitsi tsane: “Pibisiacuene meta vajaexanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vajaexanabiabijava pejamatabëcueneta, daxitajivi canaëjëtsiana Dioso pibisiacuene apo pexanaenëcuene,” jai meta tsane bajarapamonae jamatabëcuenenavëxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonae najumetsënëtsiaya xanë yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanë yabara. Bajarapacuenia pejumaitsi-vi xanë yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹¿Nexata tsaja ëjudíovi saicaya aneconijibia Dioso tane daxita mapacuapijivi vecuaje? Jume raja. Jumaitsinë baja cajena mapacueniaje. Daxitatsi mapanacuapijivitsije pibisiacuene ëvajaexanaevi. Judíovi, apo judíovi ata, bajara itsi. ¹⁰Daxitatsi pibisiacuene vajaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata. ¹¹Ajibi peyapëtaejivi pacuenia Dioso jamatabëcueneitsi. Ajibi pepacuene pejamatabëëthëtovetsina pejumecovënëtsijivi Dioso. ¹²Daxita Diosovecua naxuabiaya jinavanapa. Daxita ajamatabëcuenebeje. Ajibi pexaniacuene pexanabiabijivi. ¹³Pacuenia petëpaenë pemëthë tuxutsaeba, bajara itsi bajarapamonae pecuibovojotota pecuaicuaijajava pibisialivaisi. Pijumeta jivi yamaxëitojorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuaijajava penajumetsënëtsilivaisi. ¹⁴Pecuibovojotota cuaicuaijai

ëpibisialivaisi pianaepanaenexa. ¹⁵Itsacuene apo exanae atatsi, bepíjia jitsipa jivi pebeyaxuabinexa. ¹⁶Itsabelia jinavanapa, bejiobiaexanabiaba itsamonae. ¹⁷Bajarapamonae apo yapêtae xaniavaetsia peyajavajinavanapaenexa jivi. ¹⁸Bajarapamonae apo canaējētsi pejunavinexa Diosojavabelia, jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰Vaxaitsi baja cajena yapêtanetsi mapacueneye. Bajayata Dioso pejumelivaisi tonajumecopata ëjudíovi picani pejumecovënêtavanapaenexa. Itsiata judíovi apo jumecovënëtsicapanepae bajarapalivaisi. Bajaraxuata judíoviyajuvënënë, caenë ata, acuenebi pejumaitsinexa: “Xanë cajena apo tonaneconitsinë Dioso,” pejainexa. Daxita mapanacuapijivi, judíovi, apo judíovi ata, beyapêtane penaneconitsijava Diosojavabelia. Tsipaji itsajivi ata apo caējēpaetsi pejumecovënëtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuenë vajaexanavanapaejava vajasivajamatabëjumaitsinexa mapacueniaje: “Xaniajai rabaja. Xanë ata pibisiacuenë taexanaenë,” vajajamatabëjainexa bajarapalivaisi pejamatabëcueneta.

Pacuenia Dioso aneconijibia tane pajivi najamatabëcuenecopata Jesucristojavabelia yabara pelivaisi

²¹Aeconoxae baja mapamatacabitaje Dioso nacayapêtaeyaexana pacuenia nacatoexana aneconijibia vajanacataenexa. Dioso apo jamatabëjumaitsi: “Pamonae jumecovënëtsicapanepa Moiséspijinëta tanajumecopatsilivaisi, bajara ëpamonae aneconijibia taenajë,” apo jamatabëjai. Pacuenia Dioso capanepaejitsia Dioso pejumecovënëtsivi, bajayata Diosojumepaebivi profetavi tajëvelia yaquina Dioso pejumelivaisibaxutota. ²²Mara pacuenia Dioso jivi aneconijibia taneje. Pajivi jamatabëjumaitsi: “Xaniajai. Jesucristo itsa tēpa cruzata, pibisiacuenë taexanaecononi yabara tēpa,” jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamonae jumecovënëta Jesucristo cruzata pesivatēpaejavatsi pijaneconi yabara. Tsipaji Dioso daxitajivi najēpae-yatane. ²³Daxitajivi baja cajena pibisiacuenë exana. Bajaraxuata caejivi ata aneconijibia Dioso pejitsipaecuenia apo toponaponae. Daxitajivi Diosovecua naxuabiaya jinavanapa. ²⁴Itsiata baitsi jane Dioso pinijicuenia piasivaxae daxitajivi, aneconijibia tane daxita pamonae jumecovënëta Jesucristo cruzata pesivatēpaejavatsi pijaneconi yabara. Jivi apo namata-venonae pijacuata penaneconimatamotsinexa Diosojavabelia. Tsipaji baja aneconijibia tanetsi Jesucristo pecomuatsixaetsi pibisiacuenë pexanaeneconivecua. ²⁵Dioso copata Jesucristo petēpaenexa cruzata vajanacanecanimatamotsinexa, pibisiacuenë vajaexanaeconimi. Nexata itsa jumecovënëtatsi Jesucristo cruzata vajanacasivatēpaejava, nacavecuaajibiaexana

pibisiacuene vajaexanaeneconimi. Bajarapacuenia Dioso copata Jesucristo cruzata vajanacasivatëpaenexa mapanacuapijivitsi. Tsipaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeneconimi. Pepo bajayata pejinavanapaevimiyajuvënëvi ata, najamatabëcuenecopaba Diosojavabelia. Nexata bajarapamonaemi pibisiacuene exanae ata, itsiata Dioso apo naneconitsiaexanaetsi. Tsipaji Dioso tajëvelia yapëthane Jesucristo pesivatëpaejavanexa bajarapamonaemi ata pibisiacuene pexanaeneconi yabara. ²⁶ Ajena, mapamatacabitaje, Dioso jivi tsitanajamatabëcueneitajëta jivi pibisiacuene pexanaejava Dioso apo pejitsipae-nëcuene. Tsitanajamatabëcueneitajëtanua aneconijibia petaejavanexa pamonaë jumecovënëta Jesucristo pesivatëpaejavatsi cruzata pijaneconi pevecuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacataë vajacuata vajaexanaejava yabara. Biji rajane Dioso aneconijibia nacatane vajajumecovënëtsixae Jesucristo vajanacasivatëpaejava cruzata vajaneconi yabara. Nexata ayaijamatabëcuenejivitsi vajanacataenexa, acuenebi vajajumaitsinexa itsajivijavabelia: “Xanë taexanaejava pejamatabëcueneta, Dioso aneconijibia netane,” vajainexa acuenebi. ²⁸ Vaxaitsi baja cajena yapëtanetsi mapacueneje. Dioso aneconijibia tane pajivi jumecovënëta Jesucristo pesivatëpaejavatsi cruzata pijaneconi yabara. Bajarapajivi apo jumecovënëtsi ata Dioso Moiséspijinëta penajumecopatsilivaisi, Dioso itsiata aneconijibia tanetsi pejumecovënëtsixae Jesucristo pesivatëpaejavatsi cruzata pijaneconi yabara.

²⁹ Dioso raja ëjudïovi apo pijaDioso. Dioso raja apo judïovi ata pijaDioso. ³⁰ Caenë rabaja Dioso. Pematatsënëa baja itsanë Dioso ajibi. Bajaraponë Dioso judïovi aneconijibia tane, pamonaë jumecovënëta Jesucristo pesivatëpaejavatsi cruzata pijaneconi yabara. Bajara pijinia pacuenia Dioso aneconijibia tane pamonaë apo judïovi ata. ³¹ Vaxaitsi baja xaniavaetsia Jesucristo jumecovënëtatsi vajanacasivatëpaejava cruzata vajaneconi yabara. Nexata Dioso Moiséspijinëta penajumecopatsilivaisi yabara, apo bejamatabëjumaitsi: “Dioso Moiséspijinëta penajumecopatsilivaisi tajumecovënëtsijavami, copatajë baja. Tsipaji baja jumecovënëtajë Jesucristo tanesivatëpaejava cruzata tajaneconi yabara,” apo bejamatabëjaitsi. Biji rajane Jesucristo vajanacasivatëpaejava cruzata, itsa jumecovënëtatsi, Dioso Moiséspijinëta penajumecopatsilivaisi ata bajarajota yajavajumecovënëtatsi.

**Pacuenia Abrahampijinë bajayata Dioso aneconijibia
tanetsi pejumecovënëtsixae pacuenia Dioso
najumecapanepaeya jumaitsi yabara pelivaisi**

4 ¹ Pacatsipaebijitsiatsi pajamatabëcuenelivaisi yabara
Abrahampijinë Dioso aneconijibia tanetsi. ² Abrahampijinë

pijacuata ëpexaniacuene itsa exanabiabijitsipa, nexata jumaitsi tsipae Diosojavabelia: “Ëpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinë Diosojavabelia apo jumaitsi bajarapacuenia. Tsipaji Abrahampijinë ëpexaniacuene pija-cuata exanabiabi ata tsipae, bajaraxua yabara Dioso aneconijibia apo taetsi tsipae. ³Biji rajane Dioso pejumelivaisibaxutota Abrahampijinë yabara jumaitsi mapacueniaje: “Abrahampijinë najamatabëcopatsiaya Diosojavabelia pejamatabëjumaitsabixae: ‘Xaniajai. Pepacuene Dioso netoexanaena pacuenia najumecapanepaeya nejumaitsi,’ pejamatabëjait-sabiabixae, nexata Dioso aneconijibia tanetsi,” jai Dioso pejumelivaisiba-xutota Abrahampijinë yabara. ⁴Pajivi itsanë pijajava tonacuenebaponapo-na, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵Pajivi apo exanae ata pexaniacuene, itsiata jamatabëju-maitsi: “Dioso, ponë penaneconitsivi pijaneconivecua ajibiaexanabiaba, bajaraponë pepacuene necapanepaena pacuenia najumecapanepaeya jumaitsi tanecapanepaenexa,” jamatabëjai, bajarapajivi Dioso aneconijibia taenatsi pecapanepaenexatsi pijaneconivecua. ⁶Pepo bajayata Davidpjinë vajunupaeba pejamatabëcuenebarëyajava pamonaе baja Dioso aneco-nijibia tanetsi. Bajarapacuenia Dioso aneconijibia tanetsi bajarapamo-nae pejumecovënëtsixae Dioso najumecapanepaeya pejumaitsicueniatsi. Bajarapamonae Dioso aneconijibia apo taetsi, pijacuata ëpexaniacuene exanabiabi ata. ⁷Davidpjinë pepo bajayata tajëvelia bajarapamonae yaba-ra jumaitsi mapacueniaje:

Jamatabëcuenebarëya baja tsavanapae pamonaе picani naneconita Diosojavabelia. Barajamatabëcuenexanepanatsi baja Dioso.

Tsipaji baja pibisiacuene pexanaeneconimi, vecuaajibiaexanatsi.

⁸Jamatabëcuenebarëya baja tsaponaponae pajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpjinë bajayata.

⁹Bajarapacuenia Davidpjinë itsa jumaitsi, pejamatabëcuenebarëya-tsavanapaeви baja, ëjudíovi, peperabëcaucubivitsi yabara, apo jumaitsi. Pamonaе apo judíovi, apo peperabëcaucubivi atatsi, yabara jumaitsi. Xaniajanë pacuenia pacatsipaebijitsiatsi. Abrahampijinë bajayata Dioso jumecovënëta najumecapanepaeya pejumaitsicueniatsi. Nexata baja Abrahampijinë Dioso aneconijibia tanetsi pibisiacuene pexanaeneconimivecua. ¹⁰¿Abrahampijinë tsajane baja pepuaperabëcaucutsitsi, Dioso aneconijibia tanetsi? Jume raja. Abaxë apo perabëcaucutsinejeva atatsi, aneconijibia tanetsi pejumecovënëtsixae Dioso najumecapanepaeya peju-maitsicueniatsi. ¹¹Dioso baja aneconijibia pepuataetsi, Abrahampijinë perabëcaucutatsi. Bajarapacuenia Abrahampijinë perabëcaucutatsi daxita-jivi peyapëtaenexatsi Dioso aneconijibia petaejavatsi. Bajaraxuata daxita pamonaе apo peperabëcaucubivi atatsi, itsa jamatabëjumaitsi: “Xaniajai.

Pepacuene Dioso netoexanaena pacuenia najumecapanepaeya jumaitsi,” itsa jamatabējai, bajarapamonae Abrahampijinē bepexi Dioso tanetsi, apo peperabēcaucubivi atatsi. Abrahampijinē abaxē apo perabēcaucutsi atatsi, Dioso pejumecovēñsixaē, aneconijibia tanetsi. ¹²Xaniajai rabaja. Abrahampijinē bepexi Dioso tanetsi daxita pamonae peperabēcaucubivitsi. Bajarapamonae Abrahampijinē bepexi Dioso tanetsi apo ēpepera-bēcaucubijavatsi yabara. Biji rajane Abrahampijinē bepexi Dioso tanetsi tsipaji bajarapamonae ata abaxē apo perabēcaucubi atatsi, jumecovēñēta pacuenia Dioso najumecapanepaeya jumaitsi.

Pacuenia tocopiatatsi pajivi jumecovēñēta pacuenia Dioso najumecapanepaeya jumaitsi petoexanaenexatsi yabara pelivaisi

¹³Bajayata Dioso najumecapanepaeya jumaitsi Abrahampijinējavabelia: “Carajutsianatsi daxita mapairaje nijairanexa. Nevēnamuto ata, nexi, nemomoxi ata, pijairanexa,” jai Dioso Abrahampijinējavabelia. Bajarapacuenia Dioso jumaitsi Abrahampijinējavabelia tsipaji Dioso aneconijibia tanetsi Abrahampijinē pejumecovēñsixaē pacuenia Dioso najumecapanepaeya jumaitsi. Nexata acuenebi vajajumaitsinexa: “Abrahampijinē Dioso aneconijibia tanetsi tsipaji jumecovēñēta Dioso Moiséspijinēta penajumecovēñsilivaisi,” vajajainexa. Tsipaji baja Abrahampijinē pepuatēpae, bexēa Moiséspijinē ponapona. ¹⁴Dioso najumecapanepaeya itsa jumai tsipae perajutsinexa bajarapaira ēpamonae jumecovēñēta Dioso Moiséspijinēta penajumecopatsilivaisi, nexata bajarapamonae, Abrahampijinē pemomoxi ata, apo rajutsitsi tsipae bajarapaira. Tsipaji itsajivi ata, bajarapamonaeyajuvēñējivi, apo jumecovēñētsicapanepae Dioso Moiséspijinēta penajumecopatsilivaisi. Bajarapamonae Dioso pejumecovēñētsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipae-tsi. ¹⁵Tsipaji daxita pamonae apo jumecovēñētsi pacuenia Dioso itoroba Moiséspijinēta penajumecopatsilivaisita, bajarapamonae Dioso naneconitsiaexanaena. Itsiata baitsi jane itsa ajibi tsipae pitavetsilivaisitsi, nexata pijinia ajibi tsipae peyabarananeconitsia exanaejavanexatsi.

¹⁶Dioso cajena najumecapanepaeya jumaitsi Abrahampijinējavabelia amoneya perajutsinexa bajarapaira. Perajutsinexa Abrahampijinē pexijavabelianexa ata, pemomoxijavabelianexa ata. Bajarapaira Abrahampijinē Dioso rajutsiapaebatsi Dioso najumecapanepaeya pejumaitsijavatsi Abrahampijinē pejumecovēñsixaē. Bajarapaira Dioso najumecapanepaeya itsa rajutsiapaeba pamonae jumecovēñēta Dioso Moiséspijinēta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba pamonae ata jumecovēñēta pacuenia Dioso najumecapanepaeya jumaitsi, pacuenia bajayata Abrahampijinē jumecovēñēta Dioso najumecapanepaeya pejumaitsicueniatsi. Bajaraxuata daxitatsi,

Dioso vajajumecovënëtsivi, Dioso nacatane Abrahampijinë bepexitsi.

¹⁷Bajarapacuenia Abrahampijinë bepexitsi Dioso vajanacataejavanexa yabara, Dioso pejumaitisijava Abrahampijinëjavabelia Dioso pejumelivaisi-baxutota tajëvelia jumaitsi mapacueniaje: “Ayaibitsaëtoxaneto jivi bepijasalinainëmë cataeyaexanaenatsi,” jai Dioso pejumelivaisibaxutota tajëvelia Dioso pejumaitisijava Abrahampijinëjavabelia vaxaitsi yabara. Dioso baja cajena icatsia piasaëyaexanaenë petëpaevimi ata. Xua picani abaxë ajibi mapanacuataje, Dioso baja exana pijumeta.

¹⁸“Abraham raeta baja pexi apo xainae tsane,” sivajamatabëjai atatsi daxitajivi bajayata, itsiata Abrahampijinë Dioso apo jumeaebi.

Jumecovënëta Dioso pejumaitsicueniatsi. Evetaponapona jivi ayaibitsaëtoxaneto pamo pexanaenexatsi pacuenia Dioso najumecapanepaeya jumaitsi. ¹⁹Bajarapamatacabi Abrahampijinë imoxo pexainae cien pavaibeje. Bajaraponë pijava Sara, mavecova. Perujuvayo baja pijinia. Pexi picani pexainaenexabeje, apo caëjëpaetsibeje. Tsipaji baja bitso perujujivibeje. Bajaraxua Abrahampijinë nacueneyapëtae ata, itsiata jumecovënëta Dioso pacuenia najumecapanepaeya jumaitsi petoexanaenexatsi.

²⁰Apo jumeaebi pacuenia Dioso najumecapanepaeya jumaitsi. Bitso biji pevajënaeyabelia jamatabëcueneevetaponapona pacuenia Dioso najumecapanepaeya jumaitsi petocopiapatsinexatsi. Nexata Dioso yabara Abrahampijinë jumai tsabiabi: “Dioso cajena bitso ayaijamatabëcuenenë,” jai tsabiabi. ²¹Abrahampijinë xaniavaetsia yapëtane Dioso pecaëjëpaenëcuenetsi petoexanaenexatsi daxita pacuenia najumecapanepaeya jumaitsi. ²²Abrahampijinë Dioso jumecovënëta petoexanaenexatsi pacuenia najumecapanepaeya jumaitsi. Bajaraxuata Dioso aneconijibia tanetsi.

²³Dioso pejumelivaisibaxutota jumaitsi pacuenia Dioso aneconijibia tanetsi Abrahampijinë pejumecovënëtsixae Dioso najumecapanepaeya pejumaitsicueniatsi. Bajarapacuenia Dioso pejumelivaisibaxutota apo jumaitsi saya vajayapëtaenexa Abrahampijinë pelivaisi. ²⁴Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovënëtatsi pacuenia Dioso najumecapanepaeya jumaitsi, aneconijibia Dioso nacatane. Bajaraponë Dioso vajatuxanenë Jesucristo icatsia asaëyaexanatsi petëpaecujinae. ²⁵Dioso athëbëvetsica itorobica Jesús vajanacasivatëpaenexa mapanacuataje. Nexata Jesús itsa nacasivatëpa, nacaneconimatamota pibisiacuene vajaexanaeconimi. Bajaraxuacujinae Dioso icatsia asaëyaexanatsi petëpaejavavecua vajanacavecuajibiaexanaenexa vaneconimi. Nexata baja Dioso aneconijibia nacatane Jesús pejamatabëcueneta.

Pacuenia jamatabëcuenenabarëya pajivi Dioso aneconijibiatanetsi yabara pelivaisi

5 ¹Dioso aneconijibia nacatane vajajumecovënëtsixae pacuenia Dioso najumecapanepaeya jumaitsi. Nexata sivajamatabëcuenenabarëyatsi

tsavanapae Dioso. Vajatuxanenë Jesucristo vajanacasivatëpaexae vajaneconi yabara, bajaraponë pejamatabëcueneta nacajamatabëcuenegarëyayaexana. ² Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenegarëyatsi. Tsipaji yapëtanetsi itsamatacabi Dioso vajayajavajinavanapaejavanexa penivenivenaenacuatatsia. ³ Mapanacuapijivi nacabejiobiaexanabiabi ata, itsiata sivajamatabëcuenegarëyatsi tsabiabi. Tsipaji yapëtanetsi vajanacabejiobiaexanabiabicueneta, nacajamatabëcuenesaëyaexanapona Diosojavabelia. Nexata nacajamatabëcuenecaëjëpa vajanajamatabëcuenesaëtsinexa, daxita pibisiacuene nacatocopiapatsi ata. ⁴ Itsa najamatabëcuenesaëtatsi, nacatocopiapatsi ata pibisiacuene, Dioso pijinia nacasivabarëya. Nexata itsa yapëtanetsi Dioso vajanacasivabarëyajava, nexata jamatabëcueneevetatsi Dioso vajanacatoexanaenexa pacuenia najumecapanepaeya jumaitsi. ⁵ Nexata itsa jamatabëcueneevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espiritu Santo vajanacatsijamatabëecaenexa. Nexata Espiritu Santo xaniavaetsia nacapëtaeyaexana Dioso vajanacaasivajava.

⁶ Vaxaitsi bitso ajamatabëcuenesaëjibitsi pibisijamatabëcuenevixaetsi. Acuenebi vajacuata vajanacapanepaenexa Diosojavabelia vajaneconi yajava. Itsiata baitsi jane Dioso pecaëjëtsimatacabita, Cristo nacasivatëpa pibisiacuene vajaexanaeneconi yabara. ⁷ Mapanacuataje itsajivi itsa jamatabëcueneyavenona itsanë, nexata itsa beyaxuabiapaebatsi pejamatabëcueneyavenonaexae, pecajunavi baja apo jamatabëcueneyavenonae tsipae. Itsajivi meta itsiata jamatabëcueneyavenonaejitsipa, beyaxuabijitsia atatsi. Bajarapacuenia jamatabëcueneyavenonaejitsipa itsa bitso pexaniajamatabëcuenenë, ponëjavabelia jamatabëcueneyavenonaejitsia. ⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcuenetajëta bitso vajanacaasivajava. Dioso pexënato athëbëvetsica itorobica vajanacasivatëpaenexa mapanacuataje. ⁹ Jesucristo vajanacasivatëpaexae, nexata baja maparuaçeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabitsaëvitsi. Nexata pexënato vajanacasivatëpaexae, Dioso baja nacabarajamatabëcuenexanepana. Bajaraxuata maparuaçeje yapëtanetsi Dioso pepacuene vajanacacapanepaejavanexa vajanacananeconitsia exanaejavaminexavecua. Tsipaji pexënato asaë tsaponapona vajanacatocuaicuaijainënexa paxajavabelia. ¹¹ Orijibia vaxaitsi bitso sivajamatabëcuenegarëyatsi Dioso vajanacaasivajava. Tsipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

Adánpijinë Cristo ata yabara pelivaisi

¹² Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua

jivi petëpaejavanexa. Nexata jivi petëpaejava, yacaëjëpa daxitana-cuapijivijava. Tsipaji daxitanacuapijivi pibisiacuene exana. ¹³Dioso Moiséspijinëta penajumecopatsilivaisi ata pevajënaeya, mapanacua-pijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumaitsijavatsi: “Pananeconitame raja Diosojavabelia,” pejaijavatsi pibisiacuene pexanaejava yabara. ¹⁴Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpapon. Bajarapamona pibisiacuene itsa exana, itsiata Adánpijinë papibisiacuene exana, cuenejëpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejëpaebeye. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabëcueneta, jivi ayaibitsaëtoxaneto Dioso aneconijibia tanetsi.

¹⁵Nexata Adánpijinë papibisiacuene exana, apo najëpaebeje paxaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpapon. Biji rajane Dioso vajanacaitaxutotsoniatæjava, bitso pexaniacuene. Tsipaji Dioso athëbëvetsica itorobica vajatuxanenë Jesucristo vajanacasivatëpaenexa mapanacuataje, vajanacavecuajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecapanepaenexa jivi ayailbitsaëtoxaneto. ¹⁶Caenë saya picani Adánpijinë. Itsiata pibisiacuene itsa exana, yacaëjëpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamona jumecovënëta Jesucristo pesivatëpaejavatsi pibisiacuene pexanaeneconiyabara. ¹⁷Caenë Adánpijinë pibisiacuene pexanaexae, daxitajivi tēpapon bajarapamonaemi ata pibisiacuene pexanaexae. Itsiata caenë Jesucristo vajanacasivatëpaxae, maparucæje Dioso baja nacaitaxutotsoniatane. Bajaraxuata itsacuenejavayo ata Dioso apo toexanae atatsi, Dioso aneconijibia nacatane. Daxita pamona jumecovënëta Jesucristo pejamatabëcueneta Dioso aneconijibia petæjavatsi, bajarapamonaemi ajamatabëcuenesaë tsavanapæ tsane Dioso pejumecovënëtsijava Jesucristo peyavenonabiabixaetsi.

¹⁸Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamona jumecovënëta Jesucristo pesivatëpaejavatsi pibisiacuene pexanaeneconiyabara, Dioso aneconijibia tanetsi. Nexata bajarapamonaemi Dioso rajutsianatsi matakabi apo pevereverecæjava.

¹⁹Caenë, Adánpijinë, copiaya apo jumecovënëtsi Dioso pitorobicueniatsi.

Nexata bajaraponë pejamatabëcueneta, jivi ayaibitsaëtoxaneto pibisiacue-ne exana. Nexata icatsia bexëa caenë, Jesucristo, xaniavaetsia jumecovë-nëta Dioso pitorobicueniatsi. Nexata Jesucristo pejamatabëcueneta, jivi ayaibitsaëtoxaneto Dioso aneonijibia tanetsi.

²⁰ Bajayata Dioso Moiséspijinëta najumecopata jivi pejumecovënëtsi-nexa. Nexata bajarapalivaisi itavetatsi pibisiacueene picaní pexanaeyaniva. Itsiata baitsi jane jivi apo caëjëpaetsi penajamatabëcuenesaëtsinexa. Nexata pibisiacueene exanabiaba. Nexata bajarapalivaisi pitavetsixaetsi pibisiacueene picaní pexanaeyaniva, itsiata jivi pibisiacueene itsa exana, nacueneyapëtane pibisiacueene pexanaejava. Nexata jivi pevajënaeyabelia pibisiacueene itsa exana, Dioso pijinia pevajënaeyabelia bitso itaxutotsoniataeponatsi. ²¹ Daxitatsi tēpaenatsi. Tsipaji daxitatsi pibisiacueene exana-tsi. Bajara pijinia pacuenia daxitatsi Dioso vajanacaitaxutotsoniataexae, Dioso aneonijibia nacatane. Dioso nacarajutsiana matacabi apo pevere-vereaejava vajatuxanenë Jesucristo vajanacasivatēpaexae.

**Pacuenia Dioso pejumecovënëtsivi pejanajamatabëcuene
yajavajinavanapa yabara pelivaisi**

6 ¹ Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneonijibia nacatane. Nexata icatsia ayaicuenia Dioso vajanacaitaxutotsoniataenexa, vajava-jënaeyabelia pibisiacueene exanavanapaenatsi,” jamatabëjai meta tsane jamatabëcuenenavëxaniabiaya. ² ¡Jume raja! Pëtsa baja vaxaitsi pibi-siacueene exanatsi pematatsënëa. Petëpaenë baja apo najamatabëxainae pibisiacueene pexanaenexa. Bajara pijinia pacuenia vaxaitsi ata bejamata-bëcueneitsitsi pibisiacueene vaxaexanaeyaniva. ³ Paxamë bepapapëtaneme pajamatabëcuene yabara nabautisabatsi. Itsa nabautisabatsi, becaeperabë-to nacaexana Jesucristojavabelia. Nexata vaxaitsi bejamatabëjumaitsiitsi mapacueniaje: “Jesucristo cruzata itsa tēpa, xanë ata betaneyajavatēpae cruzata,” bejamatabëjaitsi. Bajarapajamatabëcuene yabara nabautisaba-tsi. ⁴ Itsa Jesucristo bevajanacayajavatēpae, nexata bevajanacayajava-mëthëtsitsi. Nexata Jesucristo petëpaecujinae, Dioso pesaëta icatsia itsa asaëyaexanatsi, bevajanacayajavaasaëyaexanaetsi icatsia. Vaxaitsi peja-najamatabëcuene vajayajavajinavanapaenexa, copatatsi baja vajaperujuja-matabëcuenemi. Bajarapajamatabëcuene yabara nabautisabatsi.

⁵ Becaeperabëto vajanacaexanaexae Jesucristojavabelia, nexata daxi-tatsi Jesucristo cruzata bevajanacayajavatēpae. Nexata Jesucristo petëpaecujinae, Dioso icatsia itsa asaëyaexanatsi, bevajanacayajavaa-saëyaexanaetsi. ⁶ Jesucristo itsa rutatsi cruzata pebexaxuabinexatsi, vajaperujujamatabëcuenemi yajavarutatsi vajanacavecuajibiaexanaenexa pibisiacueene vajanacaexanaeya exanaejamatabëcuenemi. Bajarapacuenia vajanacatoexanaexae, pematatsënëa baja apo bexanaetsi pibisiacueene.

7 Pacuenia baja petēpaenē pibisiacuene apo exanae, bajara pijinia vaxaitsi ata bejamatabēcuenetsitsi pibisiacuene vajaexanaeyaniva. 8 Jesucristo cruzata bevajanaacayajavatēpaexae, nexata bejamatabējumaitsi mapacueniaje: “Yajavajinavanapaenatsi Jesucristo dexitamatacabijavabelianexa,” bejamatabējaitsi. 9 Yapētanetsi vajatuxanenē Jesucristo Dioso icatsia piasaēyaexanaejavatsi petēpaecujinae. Nexata baja icatsia Cristo pematatsēnē apo tēpae tsane. 10 Itsa baja Cristo tēpa dexitajivi pibisiacuene pexanaeneconi yabara, caecuenia copiarutsiaya sivatēpa dexitamatacabijavabelianexa. Nexata baja Cristo icatsia pematatsēnē apo tēpae tsane. Biji rajane Dioso yajava dexitamatacabijavabelianexa asaē tsaponaponae tsane athēbētatsia, itsajotatsia ajibi petēpaecuene. 11 Nexata paxamē panejamatabēēthētota pajamatabējumaitsimēre tsavanapae: “Tajaperujujamatabēcuenemi baja navecuatēpaeyabajē. Nexata baja pibisiacuene apo exanaenē tsane. Biji rajane asaēnē baja tsaponaponae Dioso taneitorobicuenia tatoexanabiabinexa. Tsi paji baja tajatuxanenē Jesucristo neyjavaponapona,” pajamatabējamēre tsavanapae.

12 Bajaraxuata pētsa baja panajamatabēxainabiabame pibisiacuene paneexanaenexa panijacuata panenatojitsipaecuenia. 13 Pētsa panacopata me daxita xua pibisiacuene paneexanaenexa. Tsi paji paxamē bepantēpaecujinae, Dioso icatsia bepecaasaēyaexanaevi. Nexata pajumaitsimēre tsabiabi Dioso javabelia: “Tajatuxanenē, catonucatsi majotaje. Caja matabēcueneevetaponaponaenatsi dexitamatacabijavabelianexa pacuenia xamē jitsipame tacatoexanabiabinexa,” pajamēre tsabiabi Dioso javabelia. 14 Nexata pacacājēpaena panenajamatabēcuenesaētsinexa icatsia caevēalia paneexanaeyaniva papibisiacuene panijacuata panatojitsipame. Tsi paji Dioso papecaitaxutotsoniataexae, Dioso pacayavenonabiabiana. Nexata baja apo paexanavanapaemē tsane pacuenia pacaitoroba Dioso Moisés pijinēta penajumecopatsilivaisi.

Pacuenia itsane pajivi nacopata ēpibisiacuene pexanaejavabelia yabara pelivaisi

15 Itsajivi meta jamatabēcuenenavēxaniabiaya jamatabējumai tsane: “Dioso vajanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moisés pijinēta penajumecopatsilivaisi. Nexata baja itaxutojema pibisiacuene exanavanapaenatsi,” jamatabējai meta tsane itsajivi jamatabēcuenenavēxaniabiaya. iJume raja! Pibisiacuene apo bexanavanapaetsi. 16 Paxamē rabaja xaniavaetsia payapētaneme mapacuenije. Itsa panacopatsipame itsanē papijajivinexamē, nexata pacuenia bajaraponē pacaitorobabiaba, pajumecovēnētabibijitsipame. Bajara pijinia paitsimē tsi pae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenia, pacuenia

pacajamatabëcueneitorobabiaba, paexanavanapaejitsipame. Nexata bajarapaneconi pejamatabëcueneta papitsipame panetëpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovënétavanapaenename Dioso, nexata pacuenia Dioso pacatojitsipa, patoexanavanapaenename. ¹⁷Bajayajebi picani panacopatame pibisiacue-ne paneexanavanapaenexa. Nexata pibisiacuene bepapijajivimëcuenia, pacuenia pacajamatabecueineitorobabiaba, ëpibisiacuene paexanavanapame. Nexata itsiata maparuceje daxita panejamatabëcueneta pajumecovënétavanapame baja papexaniajailivaisi itsamonae pacatsipaebe. Bajaraxuata paxamë yabara Diosojavabelia jumaitsinë tsabiabi: “Xanepana rabaja. Ayaicuenia yavenoname bajarapamonae,” janë tsabiabi. ¹⁸Aeconoxae baja Dioso pacacopatsiaexana pibisiacuene paneexanavanapaejavami. Nexata jane baja panajamatabëxainame ëpexaniacuene paneexanavanapaenexa. ¹⁹Peyapëxanepanaecuenia pacatoyaquinatsi mapalivaisije xaniavaetsia panejumeyapëtaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimëcuenia pacuenia pacajamatabëcueneitorobabiaba, ëpibisiacuene picani paexanavanapame panevajënaeyabelia. Itsiata baja aeconoxae panajamatabëcuenerajure Diosojavabelia ëpexaniacuene paneexanavanapaenexa panevajënaeyabelia. Bajarapacuenia Dioso pacatojitsipa paneexanavanapaenexa.

²⁰Pamatacabi picani abaxë ëpibisiacuene paexanavanapame, Dioso papecatojitsipaecuenia apo paexanavanapaemë. Saya jamatejema pajinavanapame. ²¹Itsiata apo pacatoxanepanae itsacunejeyayonexa ata daxita papibisiacuene picani paexanavanapame. Payauramë tsabiabi pibisiacuene paneexanaejava. Pamonae tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²²Paxamë rabaja Dioso pacacapanepa pibisiacuene paneexanaeiconimivecua. Bajaraxuata Diosojavabelia panajamatabëcuenerajutame baja Dioso papijajivinexamë. Nexata apo panacueratsimë tsane. Dioso papecatojitsipaecuenia pajinavanapaenename. Panetëpaeucujinae paxainaenename matacabi apo pevereverecaejava. ²³Pamonae pibisiacuene pexanaevi, Dioso rajutsianatsi petëpaejavanexa, Diosovecua penaxuabinexa daxitamatacabijavabelianexa. Pamonae jumecovënëta vajatuxanenë Jesucristo pesivatëpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo pevereverecaejava.

**Pacuenia Dioso pejumecovënëtsivi Dioso Moiséspijinëta
penajumecopatsilivaisi apo bejumecovënëtsi
pecapanepaenexatsi yabara pelivaisi**

7 ¹Tajamonae, payapëtaneme rabaja Dioso Moiséspijinëta penajumecopatsilivaisi. Nexata baja pijinia payapëtaneme pacuenia jivi

bajarapalivaisi bejumecovënètavanapa itsa abaxë asaë tsavanapae mapanacuataje. Itsiata baitsi jane itsa baja tëpa, acuenebi baja pematatsënëa bajarapalivaisi pejumecovënètavanapaenexa. ² Pova baja pamona pexainaeva, acuenebi pevecuanaviatsinexa pamona, penacojobinexa icatsia itsanëjavabelia. Tsipaji Dioso Moiséspijinëta penajumecopatsilivaisi itaveta bajarapacueni. Itsiata baitsi jane pova baja pamona vecuatëpatsi, nexata matapania tocopatatsi penacojobinexa icatsia itsanëjavabelia itsa jitsipa penacojobijava. ³ Pova pamona pexainaeva, itsa nacojobijitsipa itsanëjavabelia, pamona abaxë itsa asaë tsaponaponae, nexata bajara-pova ayaineconi natsiexanaejitsipa Diosojavabelia. Tsipaji pamonavecua itsanëjavabelia naperabëquenetsiatae ponaponaejitsipa. Itsiata baitsi jane baja pova baja pamona vecuatëpatsi, Dioso Moiséspijinëta penajumecopatsilivaisi apo itavetsitsi penacojobijava itsanëjavabelia. Nexata pova baja pamona vecuatëpatsi, nacojobi ata icatsia itsanëjavabelia, ayaineconi apo natsiexanae tsipae Diosojavabelia.

⁴ Tajamona, bajara pijinia paitsimë paxamë ata. Pacuenia petiriva pamona pitorobabiabicueniatsi, jumecovënëtabiaba, bajara pijinia pacuenia pajumecovënëtabiabame picani Dioso Moiséspijinëta penajumecopatsilivaisi papecaitorobicuenia. Jesucristo bepaneyajavatëpaexae, nexata Dioso Moiséspijinëta penajumecopatsilivaisi bepanevecuatëpae. Nexata baja icatsia apo pajumecovënètavanapaemë bajarapalivaisi papecaitorobicuenia. Maparucaeje Cristo baja papijajivimë, ponë icatsia Dioso asaëyaxanatsi petëpaecujinae. Cristo icatsia Dioso bepapecayajavaasaëyaxanae pacuenia Dioso pacatojitsipa paneexanavanapaenexa. ⁵ Pamatacabi abaxë Cristo pelivaisi apo jumecovënëtsitsi, pibisiacuene exanavanapatsi vajacuata vajanatojitsipacuenia. Nexata bajarapamatacabi itsa nacaitaveta Dioso Moiséspijinëta penajumecopatsilivaisi pibisiacuene vajaexanaeyaniva, caranata saya bevajanacaitorobi pibisiacuene vajaexanaenexa. Nexata bitso pibisiacuene exanavanapatsi. Bajaraxua yabara picani Diosovecua naxuabiajinavanapatsi. ⁶ Itsiata baja maparucaeje palivaisi Dioso Moiséspijinëta najumecopata, bajarapalivaisi vajajumecovënëtsijavami, Dioso baja nacacopabiaexana Cristo bevajanacayajavatëpaexae. Nexata papexaniacuene aeconoxae exanavanapatsi, apo exanavanapaetsi saya vajanacaitorobixae bajayata peyaquinaelivaisimi, Dioso Moiséspijinëta penajumecopatsilivaisi. Jume baja cajena. Espíritu Santo raja pejanajamatabëcueneta vajanacaitorobixae, exanavanapatsi bajarapapexaniacuene.

**Dioso Moiséspijinëta penajumecopatsilivaisi, pacuenia
ata Pablo pibisiacuene pexanaenexa najamatabëxaina,
penavajunupaebijava, yabara pelivaisi**

⁷ Itsajivi meta jamatabëcuenenavëxaniabiaya jamatabëjumaitsi tsane:
“Dioso Moiséspijinëta penajumecopatsilivaisi, itsacuenejavayonexa ata

apo xanepanae,” jamatabējai meta tsane. iJume raja! Itsa ajibi tsipae baja-
rapalivaisi, nexata apo nacueneyapētaenē tsipae pibisiacuene taexanae-
java. Tsipaji Dioso Moiséspijinēta penajumecopatsilivaisita, itsalivaisianē
yajava, jumaitsi mapacueniaje: “Pētsa cobecaēbame itsajivi pexainaejava,”
jai. Nexata itsa apo yapētaenē tsipae bajarapalivaisi, xanē apo nacueneya-
pētaenē tsipae pibisiacuene taexanaejava, itsajivi pexainaejava cobecaēbi
atanē. ⁸Dioso Moiséspijinēta penajumecopatsilivaisi, itsa nitaveta itsamo-
nae pexainaejava tacobecaēbiyaniva, nexata caranata bitso betanitorobi
tacobecaēbinexa itsamonae pexainaejava. Pamatacabi abaxē apo yapē-
taenē Dioso Moiséspijinēta penajumecopatsilivaisi, apo jitsipaenē picani
taexanaenexa bajarapacuenē. ⁹Bajayata abaxē itsa apo yapētaenē bajara-
palivaisi, jamatejemanē saya. Itsiata pamatacabi xaniavaetsia yapētani-
niji xua yabara Dioso nitaveta, nexata jitsipajē bitso pibisiacuene taexanae-
xa. Bitso najamatabēxainajē. Bajarapalivaisi pejamatabēcueneta yapēta-
niji pibisiacuene taexanaexae, Diosovecua naxuabiaya tatēpaejavanexa
picani. ¹⁰Bajarapalivaisi Dioso najumecopata Moiséspijinēta jivi picani
jamatabēcuenēbarēyaya xaniavaetsia pejinavanapaenexa. Itsiata xanē
bajarapalivaisi pejamatabēcueneta apo jamatabēcuenēbarēyanē. Tsipaji
pibisiacuene taexanaexae, bajarapalivaisi pejamatabēcueneta yapētani-
niji Diosovecua tanaxuabijavanexa picani. Nexata bitso najamatabēxainajē. ¹¹
Papibisiajamatabēcuenē xainajē tajamatabēēthētota, pibisiacuene neexa-
naeyaexanabiaba. Nexata pacuenia jumaitsi bajarapalivaisi, naneconitajē
picani Diosovecua tanaxuabinexa.

¹²Palivaisi Dioso Moiséspijinēta najumecopata, pexanialivaisi caje-
na. ¹³Nexata bajarapapexanialivaisi pejamatabēcueneta yapētani-
niji Diosovecua tanaxuabijavanexa picani. Tsipaji xanē tajamatabēēthētota
papibisiajamatabēcuenē xainajē pejamatabēcueneta, exanabiabajē pibi-
siacuene. Bajaraxuata Diosovecua naxuabijitsianē picani. Bajarapacuenia
daxitajivi bajarapalivaisi pejamatabēcueneta, nacueneyapētaena pibi-
siacuene pexanaejava. Taexanaexae xua bajarapalivaisita itaveta, nane-
conitajē Diosojavabelia. Bajarapalivaisi itsa yapētani-
niji, nexata tajama-
tabēēthētota papibisiajamatabēcuenē xainajē, nitorobapona bitsoyo
pibisiacuene taexanaponaenexa.

¹⁴Palivaisi Dioso Moiséspijinēta najumecopata jivi pejumecovēnētsine-
xa, yapētanetsi bajarapalivaisi Dioso penajumecopatsijava. Bajarapalivaisi
jivi pejumecovēnētsinexa, bexaina pejanajamatabēcuenē. Itsiata baitsi
jane xanē bajara apo jamatabēcuenēitsinē. Tajacuata saya ētanatojitsipae-
cuenia exanaponaponajē. Caranata saya najamatabēxainabiabajē ēpibi-
siacuene taexanabiabinexa, papibisiajamatabēcuenē tajamatabēēthētota
xainajē taneitorobabiabicuenia. ¹⁵Xua pexaniacuene, jamatabēexanabi-
abajē picani. Itsiata bajaraxua apo exanabiabinē. Biji papibisiacuene apo
jitsipaenē picani taexanabiabinexa, bajaraxua caranata exanabiabajē.

“¿De tsaeta xuajitsia bajarapacuenia exanabiabajë?” jamatabëjanë belia. ¹⁶Itsa exanabiabajë papibisiacuene picani apo jitsipaenë taexanabiabinexa, nexata sivajamatabëbëjanë tsabiabi. Bajaraxuata yapëtaniji jane baja Dioso penajumecopsilivaisi pexanialivaisicuene. Tsipaji Dioso penajumecopsilivaisi itaveta pibisiacuene pexanaejava. ¹⁷Bajarapapibisiacuene exanae atanë, itsiata apo betanatsitaexanae itajara. Papibisiajamatabëcuene abaxë xainajë tajamatabëëthëtota, nexanaeyae-xanapona bajarapapibisiacuene. ¹⁸Tjamatabëcuene cajena bitso abeje. Yapëtaniji itsacuenejavayonexa ata apo netoxanepanae daxita tajamatabëcuene. Natojitsipajë picani pexaniacuene taexanabiabinexa. Itsiata apo nejamatabëcuenecaëjëpabiabi pexaniacuene taexanabiabinexa. ¹⁹Papexaniacuene jitsipajë taexanabiabinexa picani, itsiata apo exanabiabinë. Caranata saya exanabiabajë pibisiacuene, xua picani apo jitsipaenë taexanaenexa. ²⁰Nexata itsa exanabiabajë xua picani apo jitsipaenë taexanabiabinexa, nexata bajaraxua apo betanatsitaexanae itajara. Tsipaji papibisiajamatabëcuene abaxë xainajë tajamatabëëthëtota, nexanaeyae-xanapona bajarapapibisiacuene.

²¹Nexata jane baja yapëtaniji pacuenia jamatabëcueneitsinë tsabiabi. Paepatota picani jitsipajë pexaniacuene taexanabiabinexa, itsiata apo exanabiabinë. Tsipaji papibisiajamatabëcuene xainajë, abaxë yajavaponaponajë. ²²Tjamatabëcueneta jamatabëjumaitsinë tsabiabi: “Jitsipajë tajumecovënëtsinexa Dioso pejumelivaisi,” jamatabëjanë tsabiabi picani. ²³Itsiata baitsi jane belia najamatabëcueneyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipaenë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipaecuenia. Caranata exanabiabajë ëpibisiacuene. Tajaperujamatabëcuene saya bepíajivitonëncuenia toponaponajë.

²⁴¡Xanë bitso bejiobinë! Bajarapapibisiajamatabëcuene yabara Dioso picani nenaneconitsiaexanaejitsia tanaxuabinexa Diosovecua dexitamatacabijavabelianexa. “¿Jipatsa meta nevecuaajibiaexanaena bajarapapibisiajamatabëcuene?” jamatabëjanë belia. ²⁵Nexata Diosojavabelia jumaitsinë: “Pexaniacuene rabaja netoexaname,” janë. Tsipaji vajatuxanenë Jesucristo jamatabëcuenecaëjëpatsi taneyavenonaenexa. Bajaraxuata ëpibisiacuene jamatabëexanae atanë, jitsipajë daxita tajamatabëcueneve-tsina tajumecovënëtsinexa pacuenia Dioso itoroba.

Pacuenia Espíritu Santo nacajamatabëcueneyavenona yabara pelivaisi

8 ¹Pamonae baja Jesucristo yajavajinavanapa, bajarapamonae Dioso baja apo naneconitsiaexanaetsi tsane. Bajarapamonae penatojitsipaecuenia, pibisiacuene apo exanavanapae. Biji rajane exanavanapa pacuenia Espíritu Santo tojitsipatsi. ²Nexata bajarapacuenia xanë ata Jesucristo itsa yajavaponaponajë, nexata Espíritu Santo pesaëta neyavenonabiaba

xaniavaetsia taponaponaenexa. Nexata baja apo exanaponaenë pibisia-cuene. Papibisiajamatabëcuene picani nenaneconitsiaexanabiaba daxi-tamatacabijavabelianexa picani tananeconitsiaponaponaenexa, bajara-pajamatabëcuenemi Espíritu Santo baja nevecuaajibiaexana. ³ Vaxaitsi vajacuata apo nacajamatabëcuene caējēpae vajajumecovënëtsinexa Dioso Moiséspijinëta penajumecopatsilivaisi. Bajaraxuata apo nacacaējēpae vajacuata vajanacapanepaenexa Diosojavabelia. Itsiata Dioso caējēpa-tsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabë-jēpa picani pibisiacuene vajaexanaevi. Bajaraponë vaxaitsi pibisiacuene vajaexanaeneconi yabara, nacasivatēpa. Nexata baja nacavecuajibiae-xana papibisiajamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoe-xana vajanacajamatabëcuene caējēpaenexa pexaniacuene vajaexanaejava pacuenia Dioso Moiséspijinëta penajumecopatsilivaisi jumaitsi. Nexata nacacaējēpa vajaexanaenexa pexaniacuene. Tshipaji apo exanavanapae-tsi pacuenia vajacuata natojitsipatsi. Biji rajane exanavanapatsi pacuenia Espíritu Santo nacatojitsipa.

⁵ Pamona exanavanapa pijacuata penatojitsipaecuenia, bajarapamona jamatabëcueneenabiabatsi ëpibisiacuene pexanaenexa. Pamona pijinia exanavanapa Espíritu Santo pejitsipaecuenia, bajarapamona jamatabë-cueneenabiabatsi Espíritu Santo pejitsipaecuenia pexanavanapaenexa. ⁶ Pamona saya exanavanapa pijacuata penatojitsipaecuenia, bajarapa-mona bepejamatabëcuenetēpaevi Dioso pitabarata. Nexata Diosovecu naxuabiaya jinavanapa. Pamona pijinia exanavanapa Espíritu Santo pejitsipaecuenia, bajarapamona jamatabëcuenebarēyaya jinavanapa Dioso pitabarata. Bajarapamona itsamatacabi xainaenanua matacabi apo pevereverecejava. ⁷ Pamona saya exanavanapa pijacuata penatojitsipae-cuenia, bajarapamona itoya Dioso. Tshipaji apo exana pacuenia Dioso penajumecopatsilivaisi itorobatsi. Apo jamatabëcuene caējēpaetsi peju-mecovënëtsinexa bajarapalivaisi. ⁸ Pamona saya exanavanapa pijacuata penatojitsipaecuenia, bajarapamona apo jamatabëcuene caējēpaetsi pexa-naenexa Dioso pejitsipaecuenia.

⁹ Maparucaeje paxamë apo paexanavanapaemë pacuenia panijacuata panatojitsipame. Espíritu Santo, ponë Cristo itorobica, pepacuene pacatsi-jamatabëca. Nexata Espíritu Santo pejitsipaecuenia, paexanavanapame. Pajivi Espíritu Santo apo tsijamatabëcaetsi, bajarapajivi Cristo apo pijaji-vitonë. ¹⁰ Paneperabëto tēpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbë-tatsia jinavanapaena daxitamatacabijavabelianexa. Tshipaji Dioso aneco-nijibia pacatane. ¹¹ Dioso asaëyaexanatsi Jesús petēpacujinae. Nexata paxamë Espíritu Santo itsa pacatsijamatabëca, pacuenia Jesús Dioso

asaëyaexanatsi petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espíritu Santo papecatsijamatabëecaexae.

¹² Tajamonae, bajarapacuenia Dioso nacaexanaena. Bajaraxuata xanepana vajaexanavanapaenexa pacuenia Dioso nacatojitsipa. Copatatsi baja vajacuata vajanatojitsipaecuenia vajaexanabiabijavami. ¹³ Tsipaji pibisiacuene itsa paexanavanapaejitsipame panijacuata panenatojitsipaecuenia, nexata itsa patëpame, Diosovecua panaxuabijitsipame daxitamatacabijavabelianexa. Itsiata baitsi jane Espíritu Santo papecayavenonaejamatabëcueneta itsa pacopatame panijacuata panenatojitsipaecuenia pibisiacuene paneexanabiabijavami, nexata itsamatacabi paxainaename matacabi apo pevereverecaajava.

¹⁴ Pamonaexanavanapa Espíritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabëjunua Espíritu Santo, Dioso pexitsi nacaexana. Saya bepíjajivicueniatsi apo nacaexanae cujunaviaya vajatonacuenebinexa. ¡Jume baja cajena! Biji rajane pepacuene Dioso pexitsi nacaexana. Nexata Espíritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. ¹⁶ Vajajamatabëëthëtota Dioso pijaEspíritu Santo nacayapëtaëyaexana Dioso pexicuenetsi. ¹⁷ Nexata Dioso pexixaetsi, itsamatacabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapaenatsi Dioso pijapenivenivenaenacuataatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tsipaji baja yapëtanetsi itsamatacabi bitso vajajamatabëcuenebarëyajavanexa Dioso pijanacuataatsia. ¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatacabi Dioso nacaitajëtsijitsia bajarapamonaejavabelia Dioso pexitsi vajanacaexanaecuenene. Bajarapamonae vajanacayapëtaenexa Dioso pexicuenetsi, Dioso nacaitajëtsijitsia bajarapamonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta. ²⁰ Daxitacuene Dioso pexanaejava mapanacuataje vereverecaponaena. Tsipaji bajarapacuenia Dioso copata pevereverecaponaenexa. Bajaraxua apo naneconitsi ata Diosojavabelia, itsiata vereverecaena. Tsipaji baja Dioso copata bajarapacuenia daxitacuene pevereverecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatacabi Dioso copiarucaëyaexanaena daxitacuene pevereverecaponaejava. ²¹ Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaëyaexanaena. ²² Yapëtanetsi baja cajena

pacuenia itsi daxitacuene mapanacuataje. Pacuenia itsi unupijivi, pejuvi-javanë ata, bejiobi abaxë. Tsipaji xaina piavitanecuene, petëpaecuene ata. Nexata abaxë tsitecapona bajarapabejiobicuene mapamatacabijavaberena ataje. ²³Daxita xua tanetsi mapanacuataje, bajaraëxua bajarapacuenia apo bejiobi piavitanecuene yabara. Vaxaitsi ata cajena bejiobitsi tsavana-pae. Espíritu Santo vajanacatsijamatabëecaexae, yapëtanetsi mapacuene-je. Dioso pexixaetsi itsamatacabi nacaperabëithianaena pacuenia Cristo perabëithianatsi. Nexata bitso jitsipatsi vajajamatabëëthëtovetsina Dioso vajanacaperabëithianaenexa vajaperabëvereverecaejavavecua. ²⁴Jumecovënëtsatsi Jesucristo vajanacasivatëpaejava pibisiacuene vajaexa-naeneconi yabara. Nexata yapëtanetsi Dioso vajanacaperabëithianaenexa. Bajarapacuenia nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapae-tsi tsipae vajanacarajutsinexa. Tspaji baja ajibi tsipae vajayabaracopiaeve-tavanapaejava itsa baja nacarajutsipa. ²⁵Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetava-napatsi bajayajebi ata itsajamatabëcuene vecuaxainaenejevatsi.

²⁶Vajaajamatabëcuenesaëjibixae, Espíritu Santo nacayavenonabia-ba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espíritu Santo bëpënëa bitso nacasivanajamatabëxainaeya naca-tovajëtabiaba asaëyata Diosojavabelia. Xua apo vënëjonecapanepaetsi, Espíritu Santo nacatovajëtabiaba. ²⁷Dioso cajena vajanacajamatabëcue-neyapëtaenë pacuenia najamatabëxainatsi. Nexata Dioso yapëtane xua Espíritu Santo nacatovajëtsijitsia. Tspaji Dioso vajanacatojitsipacuena, Espíritu Santo nacatovajëtabiaba Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenemataxoxeneta daxita bajarapapibisiacuene Jesucristo peyavenonabiabixae yabara pelivaisi

²⁸Yapëtanetsi mapacueneje. Daxita xua apo vajajitsipaecuene, Dioso nacatocopata vajanacatocopiapatabiabinexa. Nexata bajaraxua nacatoco-piapatabiaba saya vajanacajamatabëcueneëjëtsinexa. Nexata bajaraxua itsa nacajamatabëcueneëjëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcue-neëjëtsijava pejamatabëcueneta vajanacajamatabëcuene asaëyaexanaeja-vanexa Diosojavabelia. Vaxaitsi Dioso nacajunata pexitsi vajanacaexanae-nexa pacuenia nacasivanajamatabëxaina. ²⁹Vajanaexanaevajënaeya ata, Dioso yapëtane pexitsi vajanacaexanaejavanexa. Nexata vajanaexanaeva-jënaeya ata, Dioso nacasivanajamatabëcuenevereta vajanacaexanaenexa pacuenia pexënato jamatabëcueneitsi. Nexata vajanaexanaevajënaeya ata, Dioso nacasivanajamatabëcuenevereta Dioso pexënato pejuyapijivitsi

ayaibitsaëtotsi vajanacaexanaenexa. ³⁰ Bajarapacuenia vajanaexanaeva-jënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaexanaenexa. Nexata jane baja mapamatacabitaje nacajunata pexitsi vajanacaexanaenexa. Dioso vajanacajunatsixae, nexata nacavecuaajibiaexana pibisiacuene vajaexanaeneconimi. Nexata baja ane-conijibia Dioso nacatane. Nexata itsamatacabi Dioso yajavajinavanapae-natsi Dioso pijapenivenivenaenacuatatsia.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonaenë. Nexata itsajivi ata apo caëjëpaetsi vajanacajamatabëcuene matatoxenetsinexa,” bejaitsi. ³² Dioso baja cajena apo nacavecua-siva pexënato. Biji rajane copata pexënato vajanacasivatëpaenexa daxita vaxaitsi vajaneconi yabara. Nexata bajarapacuenia vajanacatoexanaexae, yapëtanetsi Dioso vajanacarajutsijavanexa daxita vajanamataavenonaec-uene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniiji,” jai Dioso najumeca-panepaeya. Nexata cajena itsajivi ata apo caëjëpaetsi vajanacaneconitsi-nexa Diosojavabelia pibisiacuene vajaexanaejava yabara. ³⁴ Itsajivi ata cajena apo caëjëpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatë-pa vajanacaneconimatamotsinexa. Nexata Cristo petëpaecujinae Dioso icatsia asaëyaexanatsi. Maparucaeje Jesucristo eca athëbëtatsia, Dioso pemuxuneneta, pecujanenia. Cristo pijajivitsi Diosojavabelia nacayaji-vicuaicuaijai. ³⁵ Cristo baja cajena vajanacaasivanë. Nexata itsajivi ata apo caëjëpaetsi Cristo vajanacaasivacuene vajanavecuacopiarucaeyaexa-naenexa. Nacabejiobiaexanae ata tsipae, piayapëbejecuene nacamocopia-patsi ata tsipae, itsiata vajanacaasivanë Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanë Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxi-ta bajarapitsicuene nacamocopiapatsi ata tsipae, itsiata vajanacaasivanë Cristo tsiteca nacaasiva tsipae. ³⁶ Vaxaitsi yabara mapajamatabëcueneli-vaitsi jëpaje. Bajayata Dioso pijajivi navajunupaeba Diosojavabelia pacue-nia itsamonae bejiobiaexanaponatsi. Dioso pejumelivaisibaxutota bajara-pamonaemi penavajunupaebijume itanerubena. Jumaitsi mapacueniaje:

Xamë Diosomë, panijajivixanë, daxitamatacabi
itsamonae jamatabëpanebeyebabiaba picani. Pacuenia
oveja pebeyaxuabinexa capona, bajarapacuenia
jamatabëpaneexanabiaba,

jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapo-na. ³⁷ Nexata daxita xua pibisiacuene, nacamocopiapatabiabi-na. Nacabejiobiaexanabiabiana. Nexata itsiata vaxaitsi bajaraxua

jamatabëcuene matatoxenetabianatsi. Tshipaji Cristo vajanacaa-sivanë, nacayavenonabiabiana. ³⁸Nexata yapëtaniji mapacueneye. Itsacueneyavayo ata apo caëjëpaetsi Cristo vajanacaasivacuene vajanacavecuacopiarucaeya exanaenexa. Vajatëpaecuene ata, vajasaaëtsavanapaecuene ata, ángelevi ata, dovathivi penamatacaitorobivi ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Playapëbejecuene, xua baja nacatocopiapata, xua ata abaxë nacatocopiapatsijitsia, daxita bajaraxua ata, apo caëj;epaetsi Cristo vajanacaasivacuene vajanacavecuacopiarucaeya exanaenexa. ³⁹Athëbëabetsia vajaponaejava ata, ira bëxëpanabereca vajaponaejava ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacueneyavayo ata, apo caëjëpaetsi Cristo vajanacaasivacuene vajanacavecuacopiarucaeya exanaenexa. Yapëtanetsi Dioso vajanacaasivajava. Tshipaji Dioso vajanacaasivaxae, vajatuxanenë Jesucristo athëbëvetsica itorobicatsi vajanacasivatëpaenexa mapanacuataje.

Pacuenia Dioso pijajivinexa itapeta judíovi yabara pelivaisi

9 ¹Najamatabëcuenecopatajë Cristojavabelia. Nexata apo najumetsë-nëtsinë. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapëtaenexa, Espíritu Santo taja-matabëëthëtota neyapëtaeyaxana. ²Bitso sivanajamatabëxainajë tavëna judíovi, Israel nacuapijivi. Belia betaajamatabëtane tasivanajamatabëxainaejava bajarapamonae. ³Bajarapamonae apo pejumecovënëtsixae Cristo, bitso sivanajamatabëxainajë. Bajaraxuata bajarapamonae yabara jamatabëjumaitsinë: “Itsa xanë Dioso netocopatsipa tanaxuabinexa Cristovecua, bajarapamonae juya pecapanepaenexatsi, nexata bajarapacuenia exanae-jitsipajë bajarapamonae Dioso pecapanepaenexatsi,” jamatabëjanë belia tavëna judíovi yabara. ⁴Bajarapamonae judíovi, Israelpijinë pemomoxi. Bajarapamonae pijasalinaivimijavabelia bajayata picani Dioso ayai-cuenia yavenonabiaba. Itsiata bajarapamonaemi Dioso apo jumecovënëtsi. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitsinua bajarapamonaemijavabelia peyavenonabiabinexa. Dioso Moiséspijinëta penajumecopatsilivaisi ata, rajuta picani bajarapamonaemi pejumecovënëtavanapaenexa. Dioso picani itorobanua bajarapamonaemi pexanaenexa templobo, bajarapabota pevajëcabiabinexa Diosojavabelia. Dioso picani najumecapanepaeya jumaitsinua petoitorobinexatsica Cristo bajarapamonaemi picani pecapanepaenënexatsi pibisiacuene pexanaeconimivecua. ⁵Bajarapamonaemi pijasalinaivimi, pevënëjonevimi Dioso pejumecovënëtsijava. Cristo itsa naexana mapanacuataje, judíonëcuenia naexana. Cristo nexata pijamonae judíovi. Bajaraponë Cristo, Diosonë baja cajena, daxitacuene pevetsinë.

Nexata bajaraponējavabelia jivi jumai tsabiabi tsane: “Xamē Cristomē, bitso baja cajena ayaijamatabēcuenenēmē,” jai tsabiabi tsane daxitamata-cabijavabelianexa. Bajara itsi tsane.

⁶Itsiaata daxita judíovi apo jumecovēnētsi pacuenia Dioso najumecapanepaeya jumaitsi. Nexata Dioso apo toexanae daxita judíovijavabelia pacuenia Dioso najumecapanepaeya jumaitsi. Nexata Dioso yabara vaxaitsi jamatabēcuenenavēxaniabiaya apo bejumaitsitsi mapacueniaje: “Pacuenia Dioso najumecapanepaeya jumaitsi judíovijavabelia petoexanaenexa, bajarapacuenia itsiaata Dioso apo toexanae daxita judíovijavabelia,” apo bejaitsi vaxaitsi jamatabēcuenenavēxaniabiaya Dioso yabara. Bajarapacuenia Dioso yabara vaxaitsi jamatabēcuenenavēxaniabiaya apo bejumaitsitsi. Tsipaji Dioso tajēvelia apo itapetsi daxita judíovi pijajivinexa. Bajaraxuata pacuenia Dioso tajēvelia najumecapanepaeya jumaitsi, apo toexanae daxita judíovijavabelia. ⁷Tsipaji bajayata Abrahampijinē pemomoxi ayaibitsaēto xainae ata, daxita itsiaata Dioso apo totaetsi Abrahampijinē pepo pemomoxicuenia. Dioso tajēvelia jumaitsi Abrahampijinējavabelia mapacueniaje: “Anijanēbeje nexēnatobeje xainae atamē tsane, taitapetsinēxae, caenē nexēnato, Isaac, pexi catotaenatsi pepo nemomoxicuenia,” jai Dioso. ⁸Bajaraxuata yapētanetsi mapacuenieje. Pajivi naexanae ata Abrahampijinē pemomoxiya-juvēnjivi, itsiaata bajarapajivi Dioso apo taetsi Abrahampijinē pepo pemomojivicuenia. Matapania pajivi jumecovēnēta pacuenia Dioso najumecapanepaeya jumaitsi, bajarapajivi jane baja Abrahampijinē pepo pemomojivicuenia tanetsi Dioso. ⁹Dioso tajēvelia najumecapanepaeya jumaitsi Abrahampijinējavabelia mapacueniaje: “Icatsia caevaicujinae patsianajē. Nexata nijava, Sara, xainaena pexēnatonacueto,” jai Dioso Abrahampijinējavabelia Isaacpijinēnexa yabara.

¹⁰Nexata jane baja xuacujinae Isaacpijinē naexana. Bajaraxuacujinae icatsia bexēa Isaacpijinē baja pepuanacojiobi, Dioso icatsia tajēvelia jumaitsi vajasalinainē Isaacpijinē pijava Rebecapijivajavabelia, Rebecapijiva baja pepuayacotaponaponae sapalanēbejenexa. ¹¹⁻¹³Itsa abaxē bajaraponēbeje apo naexanaebeje, pexaniacuene ata abaxē itsa apo exanaebeje, pibisiacuene ata abaxē itsa apo exanaebeje, bajarapamatacabi Dioso tajēvelia jumaitsi Rebecapijivajavabelia mapacueniaje: “Panacuetonēyo copiaya cavecuaexanaena, bajaraponēyo jamatabēcueneevetsiana pejuyapijinē pitorobabiabinexatsi pijajivitonēcuenia,” jai Dioso tajēvelia Rebecapijivajavabelia. Bajarapacuenia Dioso pejumaitsijava Rebecapijivajavabelia najumejēpabeje pacuenia jumaitsi Dioso pejumelivaisibaxutota. Rebecapijiva pexēnatobeje yabara Dioso pejumelivaisibaxutota jumaitsi mapacueniaje: “Asivanē juyapijinē Jacob, matapijinē Esaú matatoxenetsia,” jai Dioso pejumelivaisibaxutota Dioso pejumaitsijava. Nexata bajaraponēbeje tocopiapatatsibeje pacuenia Dioso tajēvelia

jumaitsi pacuenia Dioso itapetsijitsiatsi juyapijinē. Baitsi Jacob Dioso pijajivitonēnexa itapetatsi matapijinēvecua. Nexata bajarapacuenia yapētanetsi mapacueneye. Dioso cajena baitapeta pajivi jamatabēitapeta pija-jivitonēnexa. Dioso apo itapetsi bajarapajivi pexaniacuenē pexanaejava yabara. Bajarapacuenia Dioso tajēvelia itapeta juyapijinē matapijinēvecua penaexanaevajēnaeyabeje ata cajena.

¹⁴Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitsi mapacueniaje: “Dioso baja pacuenia exana, apo xanepanae,” apo bejaitsi vaxaitsi. ¹⁵Tsipaji cajena Dioso bajayata jumaitsi Moiséspijinējavabelia: “Pajivi jamatabēitaxutotsoniataniji, itaxutotsoniataenajē,” jai Dioso. ¹⁶Nexata pajivi Dioso jamatabēitaxutotsoniatane, itaxutotsoniatane. Nexata itsajivi apo jamatabējumaitsi ata: “Jitsipajē xanē Dioso taneitaxutotsoniataejava,” apo jamatabējai ata, itsiata Dioso itaxutotsoniatanetsi. Bajarapajivi itsacuenējavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi. ¹⁷Palivaisi bajayata Dioso jumaitsi Egiptonacua pevetsinējavabelia, bajarapalivaisi Dioso pejumelivaisibaxutota ruca. Jumai tsarucac mapacueniaje: “Xanē catocopatatsi nevetsinexa nijaira. Pinijicuenē taexanaejava exanaenajē paxamē tuatuajēta. Itsiata baitsi jane apo nejumecovēnētsimē tsane. Nexata daxita nacuapijivi neyapētaena tasaēnēcuenē,” jai tsarucac Dioso pejumelivaisibaxutota Egiptonacua pevetsinējavabelia Dioso pejumaitsijava. ¹⁸Nexata pajivi Dioso jamatabēitaxutotsoniatane, itaxutotsoniatane. Pajivi pijinia Dioso jamatabēajamatabēcuenetajayaexana pejumecovēnētsiyanivatsi, ajamatabēcuenetajayaexana.

¹⁹Nexata meta Dioso yabara pajumaitsimē tsane: “Bajarapacuenia Dioso jivi itsa ajamatabēcuenetajayaexana pejumecovēnētsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovēnētsi Dioso piamatabēcuenetajaya exanaexaetsi” pajamē meta tsane Dioso yabara. ²⁰Tajamonae, pētsa bajarapacuenia pajumaitsimē. Dioso yabara cajena bajarapacuenia apo bepajumaitsimē. Tsipaji Dioso pacaexana. Canalito itsa caējēpaejitsipatsi pecuaicuajainexa, itsacanalitovecua saicayacuenia faratsi atatsi, pefaratsivatsijavabelia apo jumaitsi tsipae: “¿Detsa xuajitsia itsacanalitovecua saicayacuenia nefaratame?” apo jai tsipae pefaratsivatsijavabelia. ²¹Tsipaji atsananitota canalito pefaratsiva caējēpatsi canalito pefaratsinexa pacuenia jamatabēfarata. Nexata caējēpatsi pefaratsinexa copiaya pexaniacanalito bo tuatuajēta itabētsiaya peetsinexa. Bajaraxuacujinae bajara paatsananitoyajuvēnjavata caējēpatsi pefaratsinexa itsacanalito, beveliacanalito, pecajayabababinexa saya.

²²Bajara pijinia pacuenia Dioso baja exana jivijavabelia pacuenia tsitaxanepanatsi. Ayaicuenia Dioso jamatabēnaneconitsiaexana daxita pamonae naneconita bajaraponējavabelia. Jamatabētsitajētanua pesaē

bajarapamonaejavabelia. Itsiata baitsi jane abaxë bajayajebi Dioso najamatabëcuenecataita peverebiabivijavabelianexa. ²³ Biji rajane pamonaee Dioso jamatabëcapanepa, bajarapamonaee capanepaena. Bajarapacuenia Dioso jamatabëexana vaxaitsi vajanacaitaxutotsoniataevijavaberena, vajanacatsitanajamatabëcuene itajëtsinexa ayaijamatabëcuene pexainaejava. Tsipaji baja cajena vajanaexanaevajënaeya ata, Dioso nacaitapeta vajayajavajinavanapaenexa athëbëtatsia. ²⁴ Vaxaitsi judíoviyajuvënëvitsi. Itsamonae vaxaitsiyajuvënëvi apo judíovi. Itsiata Dioso nacajunata daxitatsi pijajivinexatsi. ²⁵ Dioso pejumelivaisibaxutota, bajayata Oseaspijinë peyaquinaebaxutota, Dioso pejumaitsijava apo judíovi yabara, tajëvelia jumaitsi mapacueniaje:

Pamonaee picani apo tajajivi, bajarapamonaee yabara jumaitsinë tsane: “Tajajivi raja mapamonaee,” janë tsane. Bajarapamonaee picani apo jitsipaenë. Itsiata bajarapamonaee yabara jumaitsinë tsane: “Tajajivi raja mapamonaee, tasivavi,” janë tsane.

²⁶ Panacuapijivijavabelia picani jumaitsinë tsane: “Paxamë raja apo patajajivimë,” janë tsane picani, itsiata bajarapanacuapijivi bexëa nejumecovënëtsiana. Nexata bajarapanacuapijivi yabara itsamonae jumai tsane: “Mara pamonaee Dioso piasaëtsaponaponaenë pexije,” jai tsane,

jai Oseaspijinë bajayata peyaquinaebaxutota, pamonaee apo judíovi ata, Dioso pijajivi pexanaejavanexatsi yabara.

²⁷ Isaíaspijinë pijinia bajayata tajëvelia judíovi yabara jumaitsi mapacueniaje: “Israelpijinë pemomoxi bitso ayaibitsaëtoxaeneto tsane. Pacuenia manuamenepijitajetaboatsapërë itsi, bajara itsane. Itsiata baitsi jane bajarapamonaeyajuvënëvi, caejiviyobeje saya, Dioso capanepaenatsi. ²⁸ Daxita pamonaee naneconita Diosojavabelia, bajarapamonaee naxanitsiayo Dioso naneconitsiaexanaena,” jai Isaíaspijinë peyaquinaebaxutota. ²⁹ Itsabaxutota pijinia Isaíaspijinë peyaquinaebaxutota, icatsia jumaitsi mapacueniaje:

Dioso raja ángelevi ayaibitsaëtoxaeneto penamatacaitorobinë.

Bajaraponë Dioso itsa apo nacaitaxutotsoniatae tsipae, nexata daxitatsi vaxaitsi, Israelpijinë pemomoxitsi, nacaverebiabijitsipa.

Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata,

jai Isaíaspijinë peyaquinaebaxutota.

**Pacuenia judíovi apo jumecovënëtsi pexanialivaisi
jivi pecapanepaelivaisinexatsi yabara pelivaisi**

³⁰ Vaxaitsi yapëtanetsi mapacuenieje. Apo judíovi picani apo jumecovënëtsi ata Dioso aneconihibia petaenexatsi, itsiata Dioso aneconihibia tanetsi, pejumecovënëtsixae Jesucristo pesivatëpaejavatsi pibisiacuene

pexanaeneconi yabara. ³¹ Itsiata baitsi jane judíovi jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tspaji apo caējëpaetsi pejumecovënëtsicapanepaenexa bajarapalivaisi. ³² Apo caējëpaetsi Dioso aneconijibia petaenexatsi. Tspaji judíovi apo jumecovënëtsi Jesucristo pesivatëpaejavatsi pibisiacuene pexanaeneconi yabara. Biji rajane jamatabëcuenenavëxaniabiaya jumai tsabiabi. “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabiajinavanapa, Cristo Dioso athëbëvetsica pitorobijavatsitsica, apo pejumecovënëtsixae. Caranata saya anaepanabiaba bajarapalivaisi yabara. ³³ Dioso tajëvelia Cristo yabara pejumaitisijava, Dioso pejumelivaisibaxutota jumaitsi mapacueniaje:

Puenetanutsianajë Jerusalén tomarata ponë itorobijitsianë jivi pecapanepaenexa. Bajaraponë itsamonae apo jumecovënëtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovënëtsiana bajaraponë, bajarapajivi apo nacueratsi tsane,

jai tajëvelia Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara.

10 ¹ Tajamonae, jitsipajë bitso jamatabëëthëtovetsina judíovi Dioso pecapanepaenexatsi. Bajaraxuata tovajëtabiabajë Diosojavabelia. ² Judíovi picani Dioso ayaicuenia bitso jamatabëtonacuenebabiaba Dioso pesivabarëyanexatsi. Itsiata baitsi jane apo yapëtae pacuenia Dioso tojitsipatsi petoexanavanapaenexa. Judíovi saya jamatabëcuenenavëxaniababiaba. ³ Bajarapamonae apo yapëtae pacuenia exanaejitsia Dioso aneconijibia petaenexatsi. Jamatabëcuenenavëxaniabiaya jumai tsabiabi: “Itsa jumecovënëtavanapaenatsi Dioso Moiséspijinëta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovënëtsi pacuenia Dioso itorobatsi pexanavanapaenexa Dioso aneconijibia petaenexatsi. ⁴ Pajivi jumecovënëta Cristo pesivatëpaejavatsi pibisiacuene pexanaeneconi yabara, bajarapajivi Dioso baja aneconijibia tanetsi. Bajaraxuata pematatsënëa baja apo benajamatabëxainae pejumecovënëtsinexa icatsia Dioso Moiséspijinëta penajumecopatsilivaisi Dioso aneconijibia petaenexatsi.

⁵ Pamonae jitsipa Dioso aneconijibia petaenexatsi pejumecovënëtsixae Dioso Moiséspijinëta penajumecopatsilivaisi, bajarapamonae yabara Moiséspijinë bajayata peyaquinaelivaisi jumaitsi mapacueniaje: “Pajivi jumecovënëtsicapanepaena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinë bajayata peyaquinaelivaisita. ⁶ Nexata baja pamonae jumecovënëta Cristo

pesivatëpaejavatsi pibisiacuene pexanaeneconi yabara, bajarapamonae pejumeitavetsinexatsi, Dioso jumaitsi mapacueniaje: “Pëtsa pajamatabë-jumaitsimë: ‘¿Jipatsa meta athëbëabetsia ponaena mapanacuayabetsicaje pebarëpatsinexatsica vajanacayavenonaenënexa?’ pajamatabëjamë pëtsa. 7Pëtsa pajamatabëjumaitsimënu: ‘¿Jipatsa meta ponaena, itsabereca petëpaevi jinavanapa, piasaëyaexanaenexa petëpaevivecua vajanacaya-venonaenënexa?’ pajamatabëjamë pëtsa, jai Dioso jivi pejumeitavetsijava. Nexata itsajivi ata apo bejamatabëjumaitsi bajarapacuenia. Tsiapaji baja Cristo athëbëvetsica patsica vajanacasivatëpaenexa mapanacuataje. Petëpaecujinae ata baja icatsia Cristo asaë petëpaejavavecua vajanacacapanepaenexa. 8Dioso aneonijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaicuaijamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. 9Itsamatacabi Diosojavabelia papecacapanepaevi tsane itsa paexanavanapenae mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëttojavavetsina Jesús petëpaecujinae icatsia Dioso piasaëyaexanaejavatsi. 10Tsiapaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneonijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneco-ni yabara. Nexata bajarapacuenia nayapëtane bajarapajivi Dioso pepacue-ne pecapanepaejavanexatsi.

11Dioso pejumelivaisibaxutota jumaitsi mapacueniaje: “Pajivi jumecovë-nëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavanexa pibisiacuene pexanaeneconi yabara. 12Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonae vajëta bajaraponëjavabelia.

13Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota.

14Itsiaata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. 15Dioso pijajivi itsa apo itorobi tsipae daxitajivi-
java Cristo pelivaisi petsipaebaponaenexa, nexata itsajivi ata apo yapëtae

tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “iPexaniacuene bitso itsa najetarubena pexanialivaisi jivi petsipaebivinexa!” jai.

¹⁶Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena
daxitanacuanëjava. Nexata baja Dioso pejumelivaisi yacaëjêpa
daxitanacuanëjava,

jai Dioso pejumelivaisibaxutota.

¹⁹Judíovi baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Moiséspijinë bajayata tajëvelia yaquina judíovi Dioso apo pejumecovënëtsijavanexa. Yaquinanua apo judíovi juya Dioso pejumecovënëtsijavanexa. Judíovijavabelia Dioso tajëvelia pejumatsijava, bajayata Moiséspijinë yaquina mapacueniaje:

Itsanacuanëpijivi paxamë bijiaya panaëcotabiabame. Bajarapamonae
tajajivi exanaenajë. Nexata bajarapamonae pacuenecaëbianame.
Bajarapamonae tajumelivaisi apo jamatabëjumeyapëtae
picani. Itsiata tajajivi exanaenajë. Nexata bajarapamonae
pacuenecaëbiaanaepanaename,

jai Moiséspijinë bajayata peyaquinaebaxutota Dioso tajëvelia pejumatsijava judíovijavabelia.

²⁰Isaíaspijinë ata bajayata ajumejunavijibia jumaitsi Dioso tajëvelia pejumatsijava. Apo judíovi yabara Dioso pejumatsijava, Isaíaspijinë jumaitsi mapacueniaje:

“Pamonae picani apo nejitsipae, apo nejumecovënëtsinua,
bajarapamonae itsiata itsamatacabi nejumecovënëtsiana. Nexata
baja neyapëtaena. Bajarapamonae apo nevënëlivaisiyanijobi ata,
najamatabëcueneitajëtsianajë bajarapamonaejavabelia,” jai Dioso
tajëvelia,

jai bajayata Isaíaspijinë.

Bajaraxuata nayapëtane tajëvelia Dioso penajamatabëcuenevere-tsijava pecapanepaenexa apo judíovi ata. ²¹Biji rajane judíovi yabara

Dioso pejumaitisijava, Isaíaspijinē bajayata jumaitsi mapacuenia-je: “Daxitamatacabi junatabiabajē pamonaē apo nejumecovēnētsi. Bajarapamonae apo exanaē taitorobicuenia,” jai bajayata Isaíaspijinē Dioso pejumaitisijava judíovi yabara. Nexata nayapētane mapacue-neje. Judíovi junatsi atatsi Dioso, itsiata apo jumecovēnētsi Dioso pecapanepaenexatsi.

**Pacuenia judíovi, Israel nacuapijiviyajuvēnēvi,
Dioso capanepaejitsiatsi yabara pelivaisi**

11 ¹¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanē ata raja judíonēnē, Israel nacuapijinēnē. Tajasalinainē cajena Abrahampijinē. Benjamínpijinē ata pemomoxiyajuvēnēnē. ²Bajayata baja cajena vajava-jēnaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapētaneme rabaja pacuenia Dioso pejumelivaisibaxutota jumaitsi profeta Elíaspijinē yabara. Profeta Elíaspijinē pina pevajētsijavata Diosojavabelia, neconitsia-ya jumaitsi Israel nacuapijivi yabara mapacueniaje: ³“Tajatuxanenē, mapamonaeje, Israel nacuapijivi, catobepona daxita pecajumelivaisi-paebivimi profetavi. Toxobabianua altarvēnējavanē, itsajota tajuitabia-ba dajubivi pecarajutsinexa ofrendacuenia. Nexata baja xanē caenēnē, nijajivitonēnē, nacopatajē. Xanē ata baja jamatabēnebeyaxuaba,” jai pina profeta Elíaspijinē Diosojavabelia Israel nacuapijivi yabara. ⁴Itsiata baitsi jane Dioso pina jumaitsi profeta Elíaspijinējavabelia mapacuenia-je: “Apo caenēmē raja. Xainajē baja tajajivi, siete mil ponēbeje, Israel nacuapijiviyajuvēnēvi. Bajarapamonae xaniavaetia nejumecovēnēta-vanapa. Pematabacabēta apo tonubenae penavajēcaenexa Baalvēnēnē, jumapectaetaeya pexanaenētsi, pitabarata,” jai pina Dioso bajaya-ta profeta Elíaspijinējavabelia. ⁵Bajara pijinia itsi maparucāe ataje. Caejiviyobeje pijinia Dioso itapetatsi pijajivinexa pitaxutotsoniataexaetsi. ⁶Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi ēpexaniacuene Dioso petoexanavanapaejava yabara, nexata saya bajarapamonae Dioso itapetsi-patsi ēpexaniacuene petoexanavanapaejava yabara. Nexata bajarapamo-nae saya Dioso pitaxutotsoniataexaetsi, apo itapetsitsi tsipae.

⁷Mara pacuenia itsi Israel nacuapijivije, Dioso apo pejumecovēnētsi-vi. Bajarapamonae apo jumecovēnētsi Dioso pecapanepaejavanexatsi. Itsiata baitsi jane bajarapamonaeyajuvēnēvi, caejiviyobeje, Dioso itape-tatsi pijajivinexa. Bajarapamonae jumecovēnēta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovēnētsi bajarapalivaisi. Tsipaji ajamatabēcuenetaja. Apo jumeco-vēnētsi Dioso pejumelivaisi, pexaniajailivaisi, pecapanepaelivaisinexatsi

picani Diosojavabelia. ⁸Israel nacuapijivi, Dioso apo pejumecovënëtsivi, yabara Dioso pejumelivaisibaxutota jumaitsi mapacueniaje: “Dioso ajamatabëcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovënëtsi. Bajara itsi bajarapamonae mapamatacabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovënëtsivi, yabara. ⁹Israel nacuapijivi, Dioso apo pejumecovënëtsivi, yabara bajayata Davidpijinë ata jumaitsi mapacueniaje:

Israel nacuapijivi fiesta itsa exanabiaba,
 jamatabëcuenenavëxaniabiaya jamatabëjumai tsabiabi: “Dioso cajena nacasivabarëya. Bajaraxuata ayaijava vajaxinaejava xainatsi,” jamatabëjai tsabiabi. Itsiata baitsi jane pebarëyajavata, itsamatacabi jemata tocopiapatsianatsi pijaneconi yabara Dioso jane baja penaneconitsiaexanaejavanexatsi. ¹⁰Bajarapamonae apo yapëtae pijaneconi peyajavajinavanapaejava daxitamatacabi. Pacuenia bitso piarevejave pecaponaevi, nabëxëtsutsiaya bacapona, bajara itsi bajarapamonae pejamatabëëthëtotopi pijaneconi yabara. Bitso yanajamatabëxaina pijaneconi, jai bajayata Davidpijinë Israel nacuapijivi, Dioso apo pejumecovënëtsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹Judíovi apo jumecovënëtsi ata Cristo pesivatëpaejavatsi pecapane-paenexatsi Diosojavabelia, itsiata abaxë Dioso apo navecuaxuabi judíovi daxitamatacabijavabelianexa. Judíovi apo pejumecovënëtsixae Cristo pelivaisi, juya apo judíovi Dioso tocopatatsi pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovënëtsijava Cristo pelivaisi, judíovi itsa taena, nexata judíovi ata jumecovënëtsiana Cristo pelivaisi pecapanepaenexatsi Diosojavabelia.

¹²Judíovi apo jumecovënëtsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovënëtsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovënëtsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovënëtsinexa Cristo pelivaisi. Itsiata baitsi jane pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitajarabiana pamatacabi judíovi ayaiBITSaëto jane baja jumecovënëtsiana Cristo pelivaisi.

¹³Aeconoxae baja palivaisi pacatsipaebatsi, bajarapalivaisi paxamë apo pajudíovinexamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinxaxa

Dioso pejumelivaisi. Nexata jamatabējumaitsinē: “Dioso cajena neto-copata ayaijamatabēcuenē pexinaelivaisi jivi tatsipaebaponaenexa,” jamatabējanē. ¹⁴Bajarapacuenia Dioso pejumelivaisi pacatsipaebaponatsi tsipaji jitsipajā tajaviriavi ata, judíovi, Dioso petoexanaenexatsi pacuenia paxamē ata Dioso pacatoexana papecacapanepaenexa. Nexata meta bajarapacuenia judíoviyajuvēnēvi ata jumecovēnētsiana Cristo pelivaisi pecapanepaenexatsi Diosojavabelia. ¹⁵Judíoviyajuvēnēvi Cristo navecuaitaveta. Nexata juya pamonae apo judíovi, Dioso barajamatabēcuenexanepanaeyatane. Pamatacabi judíovi jumecovēnētsiana Cristo pelivaisi, Dioso pitsianatsi pijajivinexa. Bajaraxua bitso pinijicuene tsane. Judíovi aeconoxae bepetēpaevi Dioso tanetsi apo pejumecovēnētsixae Cristo pelivaisi. Nexata pamatacabi judíovi jumecovēnētsiana Cristo pelivaisi, Dioso taenatsi petēpaecujinae bepiasaēyaexanaevitsi. ¹⁶Panbē jivi ofrendacuenia itsa rajuta Diosojavabelia, copiaya pexanaepanbē barajuta. Nexata bajarapapanmatabēta cotocaevi pexanaepan ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxērananē ata Dioso pijamaxērananēcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinexa, nexata judíovi pemomoxi ata Dioso pijajivicuenia tane.

¹⁷Dioso tane judíovi, beolivonaemaxērananē. Olivonaenē pexinaenē, pepo olivonaemaxērananē caucuba juya saicayaviria olivonaemaxēranaxi perubinexa bajarapacovēta. Nexata pepo olivonae ēnētuaatujēpijime-
ra junua bajarapamaxēranaxi ēnētuaatujējava pejuvarubenaenexa pepo olivonaemaxēranajavaberena. Bajara pijinia pacuenia Dioso pacatoexana paxamē apo pajudíovimē. Judíovi apo pejumecovēnētsixae Cristo pelivaisi, paxamē juya, apo pajudíovimē, Dioso papijajivimē pacaexana. ¹⁸“Judíovivecua Dioso papijajivinē paneexana. Nexata paayaijamatabēcuenevinē judíovivecua,” pajamē pētsa. Tsipaji payapētaneme mapacueneje. Naejava, petabunepe pejamatabēcueneta, xaniavaetsia nuca. Pemaxērana pejamatabēcueneta, xaniavaetsia apo nucae. Bajara pijinia paxamē ata paitsimē. Apo pacacaējēpae paneyavenonaenexa judíovijavabelia. Biji rajane judíovi bepapecayavenonae. Tsipaji judíovi apo jumecovēnētsi Cristo pelivaisi. Nexata judíovi apo pejumecovēnētsixae, Cristo pelivaisi juya paxamē Dioso pacaitaxutotsoniatane. Nexata pacatocopata Cristo pelivaisi panejumecovēnētsinexa Dioso papecacapanepaenexa panijaneconivecua.

¹⁹Nexata meta pajumaitsimē: “Pacuenia olivonaenē pexinaenē, olivonaemaxērananē caucuba, bajarapacovēta juya perubinexa itsaviriaolivonaemaxēranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinexatsi,” pajamē meta.

²⁰Pacuenia olivonaenē pexinaenē, pibisiamaxērana caucuta, bajara

pijinia itsi Dioso. Dioso navecuatsata judíovi apo pejumecovënëtsixae Cristo pelivaisi. Pacuenia olivonaenë pexainaenë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judíovi pejamatabëcuenemi, pacapita Dioso papijajivinexamë panejumecovënëtsixae Cristo pelivaisi. Bajaraxuata pëtsa panataneme paayaijamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava. ²¹ Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia itsa apo pajumecovënëtavanapaemë tsipae Cristo pelivaisi. ²² Bajaraxuata pacanaëjère mapacueneye. Dioso bitso papecaita-xutotsoniataexae, pacatocopata Cristo pelivaisi panejumecovënëtsinexa. Pacanaëjèrenua mapacueneye. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaе apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëtavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. ²³ Judíovi Dioso pejumeaebijava itsa copatsiana, nexata jumecovënëtsiana Cristo pesivatëpaejavatsi pecapane-paenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenë pexainaenë, pecaucutsimaxëranami icatsia caevëarena pecovëta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxërana ruta pepo olivonaemaxëranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudíovi atamë Dioso papijajivinexamë. Paxamë apo pajudíoviriavi atamë, itsiata Dioso pacapita papijajivinexamë. Judíovi biji toyapëxanepanatsi icatsia pepitsinexatsi Dioso pijajivinexa. Tsipaji bajarapamonae pijasalinaivimi ata Dioso itapeta pijajivinexa.

**Pacuenia Dioso capanepaejitsia judíovi,
Israel nacuapijivi, yabara pelivaisi**

²⁵ Tajamonae, panejamatabëjumaitsiyaniva mapacueniaje: “Vaxaitsi bitso vajayapëtaevi,” panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja. Nexata bajarapamonae apo jumecovënëtsi Cristo pelivaisi. Nexata ayaibitsaëtoxaneto apo judíovi, itsa

jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi. ²⁶Nexata daxita pamonaе judíovi, itsamatacabi Dioso capanepaenatsi pacuenia baja Dioso pejumelivaisiba-xutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxitajivi pecapanepaenënexa. Bajaraponë daxita judíovi, pamonaе Israelpijinë pemomoxi, vecuaajibiaexanaena pibisiacuene pexanaeconimi. ²⁷Itsa bajaraponë vecuaajibiaexanaena pibisiacuene pexanaeconimi, nexata jane baja toexanaenajë pacuenia bajayata tajëvelia najumecapanepaеya jumaitsinë bajarapamonaе pijasalinaivimijavabelia,

jai tajëvelia Dioso pejumelivaisibaxutota Dioso pejumaitsijsava judíovi pecapanepaejavanexa Cristo pejamatabëcueneta.

²⁸Judíoviyajuvënëvi Dioso pijavajabitsaë naexana. Tsipaji apo jumeco-vënëtsi Cristo pelivaisi pecapanepaenexatsi Diosojavabelia. Itsiata abaxë tsiteca Dioso asiva judíovi. Tsipaji bajayata copiata Dioso itapeta bajara-pamonaе pijasalinaivimi pijajivinexa. ²⁹Xua Dioso rajuta judíovijavabe-lia, apo vecuacnaviatsi. Pamonaе pijinia Dioso junata pijajivinexa, apo navecuaxuabi tsane. Nexata itsamatacabi bajarapamonaе Dioso athëbë-tatsia yajavaecaena daxitamatacabijavabelianexa. ³⁰Paxamë apo pajudío-vimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. ³¹Bajara pijinia pacuenia itsane judíovi ata. Maparucaeje abaxë judíovi apo jumecovënëtsi Cristo pelivaisi. Itsiata itsamatacabijava-belia judíovi ata Dioso itaxutotsoniataenatsi pacuenia paxamë ata Dioso pacaitaxutotsoniatane. ³²Dioso tocopata daxitajivi pijacuata penatojitsi-paecuenia pexanavanapaenexa Dioso pitorobicueniatsi apo pejumecovë-nëtsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonaе.

³³iDioso baja cajena pitaxutotsoniataenë daxitajivi pecapanepaenexa! iDioso cajena bitso peyapëtaenë! iDaxitalivaisi bitso pejumeyapëtaenë-nua! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneyapëtae-tsi. ³⁴Dioso pejumelivaisibaxutota jumaitsi mapacueniaje. “Vaxaitsi apo jamatabëcueneyapëtaetsi xua najamatabëxaina Dioso. Apo nacacaëjëpae-nua vajamuxujiobinexa ata. ³⁵Dioso cajena itsajivijavabelia ata apo amo-neyabi. Nexata xua Dioso rajuta itsajivijavabelia, apo rajutsi piamoneyabi-matamo,” jai Dioso pejumelivaisibaxutota Dioso yabara. ³⁶Tsipaji cajena Dioso pijacuata exana daxitacuene. Evetanua daxitacuene. Daxitacuene

baja cajena Dioso pijajava. Nexata Diosojavabelia vaxaitsi bejumaitsitsi tsabiabi mapacueniaje: “iDiosomë, bitso ayaijatabëcuenenëmë!” bejaitsi tsabiabi daxitamatacabijavabelianexa. Bajara itsi tsane.

**Pacuenia Dioso pejumecovënëtsinë
benajamatabëcuenerajuta Diosojavabelia pijajivitonënexa
daxitamatacabijavabelianexa yabara pelivaisi**

12 ¹Tajamonae, payapëtaneme rabaja Dioso ayaicuenia vajanacai-taxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacuenebijava, pacaasaëmëre tsavanapae papecasivabarëyanexa Dioso. Bjarapacuenia Diosojavabelia panajamatabëcuenerajure panejamatabëëthëtojavavetsina panetsitanajamatabëcueneitajëtsinexa pepacuene panejitsipaejava Dioso. ²Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcuenecopare Diosojavabelia papecarajutsinexa pejanajamatabëcuene. Nexata bjarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bjaraxua bitso pexaniacuene. Bjaraxua itsa paexanabiabianame, Dioso pacasivabarëya tsane.

³Dioso raja taneitaxutotsoniataexae, nitoroba tatonacuenebinexa. Bjaraxuata mapacuenia pacajumaitsitsije. Pacuenia baja aeconoxae pajamatabëcueneitsimë tsavanapae, bjarapajamatabëcuene matatoxenetsia pëtsa panataneme paayaijatabëcuenevimë bitso. Biji rajane pacaejivimë canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcuenecopatsixae Diosojavabelia, bjarapacuenia saya baja panataema. ⁴Jivi itsa naexana, yajavanaexana peperabëto, caeperabëtoreca. Itsiata bjarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijavanexa. ⁵Bajara pijinia pacuenia vaxaitsi ata itsitsi, Jesucristojavabelia vajanajamatabëcuenecopatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶Caiejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipae-babiabinexa Dioso pejumelivaisi, nexata betsipaebabiabatsi xaniavaetsia pacuenia nacajamatabëcuene caëjëpaeyaexana. ⁷Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso

pejumecovënëtsivi. Pajivi pijinia Dioso jamatabëcuene caējëpaeyaexanatsi Dioso pejumelivaisi jivi petsipaebabiabinexa, xaniavaetsia betsipaebabiaba daxita pejamatabëcuenesaëta. ⁸Pajivi pijinia Dioso jamatabëcuene caējëpaeyaexanatsi itsamonae pemuxujiobabiabinexa pejamatabëcueneasaëyaexanaenexa Dioso pejumecovënëtsijava, bajarapajivi bemuxujiobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacuenejava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaë ata bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. ¹⁰Pacuenia nacaenapijivi bitso nasiva, bajarapacuenia panaasivamëre tsavanapae Cristo papijajivixaemë. Itsamonae Dioso pejumecovënëtsivi, patojitsipare itsamonae petanexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

¹¹Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹²Pasivabarëyamëre tsavanapae. Tsipaji rabaja payapëtaneme itsamatacabi panexinaejavanexa matacabi apo pevereverecejava. Itsamonae itsa pacabejiobiaexana Cristo papijajivixaemë, bajayajebi ata, pëtsa pacopatame. Daxitamatacabi pavajëtabiabarë Diosojavabelia pacopatsinejevamë.

¹³Itsajota Dioso pejumecovënëtsivi namatavenona, payavenonabiabare. Pamonaë pacasivaxaina panijaboyaberena, xaniavaetsia pacopiapitabiabare.

¹⁴Pamonaë pibisiacuene pacaexana, patovajëtabiabarë Diosojavabelia Dioso peyavenonaenexatsi. Patovajëtabiabarë pexaniacuene. Pëtsa patovajëtabiabarë pibisiacuene juya pibisiacuene pexanaenexatsi.

¹⁵Pamonaë barëya petocopiapatsixaetsi pexaniacuene, bajarapamonaë paxamë ata pajamatabëcuene yavenonaëya barëyamëre. Pamonaë pijinia nua petocopiapatsixaetsi apo pejitsipaecuene, bajarapamonaë paxamë ata pajamatabëcuene yavenonaëyanuema.

¹⁶Najamatabëcuenejëpaëya pajinavanapare. Pëtsa panataneme paayaijamatabëcuenevimë. Pamonaë beeveliajamatabëcuenevi ata, xaniavaetsia pataëma. Xaniavaetsia payajavajinavanaparenua. “Xanë bitso tayapëtaenë itsamonae matatoxenetsia,” pajamatabëjamë pëtsa.

¹⁷Itsajivi pibisiacuene itsa pacaexana, pëtsa juya pibisiacuene panamamotoexaname. Paexanabiabare ëpexaniacuene, xua jivi tsitaxanepanatsi.

¹⁸Xua Dioso pacajamatabëcuenecaëjëpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitaji-vijavabelia itsacuenene paexanaenejevamë. ¹⁹Tajamonae bitso patacaasi-vavi, itsamonae pibisiacuene itsa pacaexana, pëtsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumaitsijava, Dioso pejumelivaisibaxutota jumaitsi mapacueniaje: “Pamonae pibisiacuene exana itsamonaejavabelia, xanë naneconitsiaexanaenajë,” jai Dioso pejumelivaisibaxutota. ²⁰Dioso pejumelivaisibaxutota itsabaxutota pijinia jumaitsi mapacueniaje: “Nijavajabitsaënë itsa piajani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaënë ata,” jai Dioso pejumelivaisibaxutota. ²¹Itsajivi pibisiacuene itsa pacaexana, pëtsa pibisiacuene panamatamoexaname. Tsipaji bajarapacuenia panajamatabëcuene bijianaëjitsipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabëcuenecaeviaexanaename.

13 ¹Daxita pamonaë gobierno pijajivi, papecyanacuaevetsivi, pacuenia bajarapamonae pacaitoroba, xaniavaetsia pajumecovënëtabiabare. Tsipaji bajarapamonae, caenë canacujitsia, Dioso pejamatabëcueneta pacayanacuaeveta. Daxita pamonaë nacua pevetsivi, pacaeveta Dioso petocopatsixaetsi. ²Nexata pajivi apo jumecovënëtsi pacuenia nacuaevetsinë itorobatsi, bajarapajivi Dioso ata apo jumecovënëtsi. Pamonaë apo jumecovënëtsi, nexata bajarapamonae Dioso naneco-nitsiaexanaenatsi. ³Pamonaë pexaniacuene exanavanapa, nacuaevetsivi apo cujunavi. Pamonaë pijinia pibisiacuene exanavanapa, nacuaevetsivi cujunava. Paxamë nexata pexaniacuene paexanavanapare ajunavijibia panejinavanapaenexa. Nexata pacasivabarëya tsane papecyanacuaevetsivi. ⁴Bajarapamonae Dioso pejamatabëcueneta nacuenebavanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuaevetsivi bepacujunavame. Tsipaji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamonaë pibisiacuene pexanaëvi. ⁵Bajaraxuata bejumecovënëtatsi pamonaë vajanacayanacuaevetsivi. Apo jumecovënëtsitsi saya vajanacananeconitsiaexanaeyaniva. Jume baja cajena. Biji rajane jumecovënëtatsi tsipaji Dioso pijajivixaetsi, vajamatabëcueneta yapëtanetsi pacuenia bexanavanapatsi. ⁶Bajaraxuata nacuaevetsivijavabelia impuestomatamo pamatamotabiabame panemata-motsipalatata penaevetsinexa. Nacuaevetsivi, Dioso pejamatabëcueneta, tocopatatsi nacua pevetsinexa. Nexata nacua ëpevetsicuene nacueneba.

⁷Pacuenia pacaëjivimë canacujitsia bepatoexaname gobierno pejamatabëcueneta penacuenebivijavabelia, bajarapacuenia patoexanabiabare. Bajarapamonaëyajuvënëvi itsa caetuata impuestomatamo, xuavajëto

pamoneyabame, pamatamotabiabare. Pamonaе pijinia peyaiyataevitsi, payaiya-taeyabiabare. Pamonaе peyaiyataevitsi, bajarapamonaе pexaniacuenia pabara-cuaicuaijamëre tsabiabi. ⁸Pëtsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamë ata panaasivamëre tsavanapae. Pajivi asiva itsajivi ata pacuenia nasiva pijacuata, bajarapajivi jumecovënëtsicapane-pa Dioso Moiséspijinëta penajumecopatsilivaisi. ⁹Dioso Moiséspijinëta pena-jumecopatsilivaisi, itaveta mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa najumetsënëtsiaya baracuaicuaijamë itsajivi. Pëtsa cobecaëbame itsajivi pexinaejava,” jai Dioso Moiséspijinëta penajumecopatsilivaisi. Nexata paxamë itsa pajumecovënëtsicapanaepaejitsipame daxita mapalivaisije, itsalivaisiyo ata yajava, pajumecovënëtsicapanaepaejitsipame mapejumaitsilivaisiyoje: “Asivamëre itsajivi ata pacuenia xamë nijacuata nasivamë,” pejailivaisiyo. ¹⁰Tsipaji pajivi asiva itsajivi ata, pibisiacue apo exanae bajarapajivijavabelia. Bajaraxuata itsa asivatsi itsamonae ata, nexata jumecovënëtsicapanaepatsi daxita pacuenia Dioso nacaitoroba.

¹¹Bajarapacuenia itsamonae ata biasivatsi. Tsipaji baja yapëtane-tsi bitso baja imoxoyo pevajënae icatsia Jesucristo pepatsijavanexatsica. Vajanacacapanepaenënexa, najetarucaena vajanacacapanepaenexa mapanacua-vecuaje. Pamatacabi taxuxuabatsi Jesucristo vajajumecovënëtsijava, nacatsita tajëvajënae abaxë itajara Jesucristo icatsia pepatsijavanexatsica. Aeconoxae baja bitso imoxoyo pevajënae icatsia Jesucristo pepatsijavanexatsica. ¹²Meravi abaxë aitaquiri. Itsa baja icatsia matababijitsia, pitaquirijavami baja ajibi tsaponae. Bajara pijinia pacuenia imoxoyo baja pevajënae pecopiarucaenexa mapanacua-pijivi pibisiacue pexanaejava yabara piamatabëcueneitaquirijavami. Tsipaji baja imoxoyo pevajënae icatsia Jesucristo pepatsijavanexatsica. Bajaraxuata bexanavanapatsi ëpexaniacue Dioso pejitsipaecuenia. ¹³Aeconoxae baja vajavajënaeyabelia, jinavanapaenatsi xaniavaetsia vajayapëtaexae pexaniajalivaisi. Apo ponae tsanetsi piaitajibivijava. Apo ponae tsanetsi fiestajava ata, itsajota pibisiacue exanavanapa. Apo exanae tsanetsi pibisiacue vajavitota. Apo exanae tsanetsi itsacuejava ata, xua pibisiacue. Nabijataeya apo naju-meanaenotsi tsanetsi. Itsamonae ata apo cuenecaëbi tsanetsinua. ¹⁴Biji rajane vajëtabiabanatsi vajatuxanenë Jesucristojavabelia vajanacayavenonabiabinexa. Vajatuxanenë Jesucristo nacajamatabëcueneasaëyaexanaena vajatojinavana-paenexa vajanacatojitsipaecuenia. Apo sivanajamatabëxainae tsanetsi pacuenia vajacuata natojitsipatsi pibisiacue vaxaxanaenexa.

Pacuenia Pablo itaveta Roma tomarapijivi Dioso penajuajumecovënëtsivi itsa janitane pexaejava jumapecataeya pexanaenëanëjavabelia peyajuvënërajutsivi, “Pibisiacue exana mapajivije,” pejaiyaniva, yabara pelivaisi

14

¹Pajivi jumecovënëtsi ata Jesucristo pesivatëpaejavatsi pija-neconi yabara, itsiata abaxë itsa apo ajamatabëcuenesaë

pejumecovënëtsijava, bajarapajivi ata xaniavaetsia pacopiapire pane-nacaetuatsibojavaberena itsa najunua. Bajarapajivi pijaneconi yabara Jesucristo pesivatëpaejavatsi pejumecovënëtsicujinae, copata baja pexae-yabiabijavami jumapecataeya pexanaenëanëjavabelia perajutsiyajuvënëvi. Nexata baja cjunava pexaejava, bepibisiacuene pexanaejava petaexae. Pëtsa pajumeanaenotame bajarapitsijivijavabelia panexaeyaexanaenexa icatsia bajarapayajuvënëvi. ²Itsamonae Cristojavabelia penajamatabë-cuenecopatsivi, jamatabëjumaitsi: “Daxitacuene xanepana vajaxaenexa,” jamatabëjai. Itsamonae pijinia abaxë jamatabëjumaitsi: “Dioso nacaneconitsiaexanaeitsipa jumapecataeya pexanaenëanëjavabelia perajutsiyajuvënëvi itsa xanetsi,” jamatabëjai. Nexata ëpeubijava xane jumapecataeya pexanaenëanëjavabelia perajutsiyajuvënëvi pexaeyaniva. ³Nexata pajivi xane jumapecataeya pexanaenëanëjavabelia perajutsiyajuvënëvi, pëtsa bijiaya tane pajivi apo xae jumapecataeya pexanaenëanëjavabelia perajutsiyajuvënëvi. Pajivi pijinia apo xae jumapecataeya pexanaenëanëjavabelia perajutsiyajuvënëvi, pëtsa neconitsiaya jumaitsi jivijavabelia: “Pibisiacuene exana pajivi xane jumapecataeya pexanaenëanëjavabelia perajutsiyajuvënëvi,” jai pëtsa. Tsipaji Cristojavabelia penajamatabë-cuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. ⁴Dioso apo paca-tocopatsi Dioso pijajivitonë neconitsiaya jivijavabelia panejumaitsinexa mapacueniaje: “Xua exana bajaraponë, pibisiacuene. Nexata Dioso naneconitsiaexanaenatsi,” panejainexa. Dioso pijajivitonë xaniavaetsia Dioso itsa tonacueneba, xaniavaetsia apo tonacuenebi atanua, caenë, Dioso, toxanepanatsi, pacuenia jamatabëjumaitsi, pejumaitsinexa pijajivitonëjavabelia. Dioso cajena caëjëpatsi peyavenonaenexa pijajivi pejitsipacuenia xaniavaetsia petojinavanapaenexatsi pesivabarëyanexa.

⁵Itsamonae Dioso pejumecovënëtsivi yaiyataeyabiaba matakabi. Nexata itsamatacabianëvecua caematacabi yaiyataeyabiaba. Itsamonae pijinia najëpaeya tane daxitamatacabianë. Pamonaeyaiyataeyabiaba caematacabi itsamatacabianëvecua, bajarapamonaeyaiyataeyabiaba beyapëtane pajamatabëcuenelivaisi yabara yaiyataeyabiaba caematacabi. Pamonaeyaiyataeyabiaba tane daxitamatacabianë, xaniavaetsia beyapëtane pajamatabëcuenelivaisi yabara najëpaeya tane daxitamatacabianë. ⁶Pajivi nacueraeveta itsamatacabi, bajarapajivi nacueraeveta peyaiyataenexa Dioso. Pajivi pijinia apo nacueraevetsi bajarapamatacabi, apo nacueraevetsi tsipaji jamatabëexana pacuenia Dioso itorobatsi. Pajivi pijinia xane jumapecataeya pexanaenëanëjavabelia perajutsiyajuvënëvi, bajarapajivi xane peyaiyataenexa Dioso. Tsipaji jamatabëjumaitsi: “Dioso cajena netocopata daxitacuene taxaenexa,” jamatabëjai. Nexata pexania-jamatabëcuene rajutabiaba Diosojavabelia. Pajivi pijinia apo xae jumapecataeya pexanaenëanëjavabelia perajutsiyajuvënëvi, bajarapajivi apo

xae peyaiyataenexa Dioso. Tshipaji jamatabējumaitsi: “Mapavije apo xaeñe tananeconitsiyaniva Diosojavabelia,” jamatabėjai. Nexata pexaniajamatabēcuenene rajutabiaba Diosojavabelia ēpeubijava pexaeyabiabixae.

⁷Itsajivi ata vaxaitsiyajuvēñjivi, Dioso pejumecovēñētsijivi, apo ponaponae ēpijacuata penatojitsipaecuenia pexanaponaponaeenexa. Biji rajane exanaponapona pacuenia Cristo tojitsipatsi. Petēpaematacabinexa ata yabara, apo jamatabējumaitsi: “Tēpaenajē pamatacabi natojitsipajē tatēpaejava,” apo jamatabėjai. ⁸Vaxaitsi abaxē vajaasaētsavanapaepato, tojinavanapatsi pacuenia vajatuxanenē nacatojitsipa. Itsiata baitsi jane itsamatacabi, tēpaenatsi. Tshipaji Dioso nacatojitsipaena vajatēpaenexa. Aeconoxae abaxē vajaasaētsavanapaevi, vajatuxanenē pijajivitsi tsavana-pae. Vajatēpaecujinae ata tsane, tsiteca vajatuxanenē pijajivitsi tsavana-pae tsane. ⁹Cristo baja cajena nacasivatēpa vajatuxanenē vajaexanaenexa. Nexata icatsia Cristo asaē tsaponaponae petēpaecujinae. Bajaraxuata Cristo daxitajivi pijatuxanenē. Piasaētsavanapaevi, petēpaevi ata, daxita pamonae najamatabēcuenecopata bajaraponējavabelia, Cristo cajena pijatuxanenē.

¹⁰Bajaraxuata nexata jumapecataeya pexanaenēanējavabelia perajutsiyajuvēñēvi paxamē panijabananē pexaejava yabara, baracuai-cuaijaiya apo bepajumaitsimē mapacueniaje: “Maponēje pibisiacuene exana. Nexata Dioso naneconitsiaexanaenatsi,” apo bepajamē. Bijiaya ata apo bepataemē bajaraponē. Tshipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajana-vajunupaebaponaenexa daxita pacuenia exanavanapatsi mapanacuataje. ¹¹Bajaraxua yabara Dioso pejumelivaisibaxutota tajēvelia jumaitsi mapacueniaje:

Dioso tajēvelia jumaitsi: “Xanē daxitamatacabijavabelianexa tasaētsaponaponaenē. Nexata tajumaitsiijume xaniajanē. Itsamatacabi daxitajivi taitabarata pematatabacabēta netonubenaena taneyaiyataexae. Daxitajivi nevajunupaebiana Diosonēcuenenē,”

jai Dioso pejumelivaisibaxutota mapacueniaje Dioso tajēvelia pejumaitsijava daxitajivi yabara.

¹²Nexata vaxaitsi itsamatacabi, caejivitsi canacujitsia, navajunu-paebaponaenatsi Diosojavabelia daxita pacuenia exanavanapatsi mapanacuataje.

**Pacuenia Pablo itaveta Roma tomarapijivi Dioso
penajuajumecovēñētsivi Diosovecua pejopaeyaexanaeyaniva
petsitaexanaejava pejamatabēcueneta yabara pelivaisi**

¹³Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje.

Bajaraxuata itsanë vajabananë pexanaejava yabara, apo bebaracuauicuai-jaiti pibisiacuenia. Biji rajane bejamatabëjumaititsi mapacueniaje: “Apo tsitaexanaanë tsane itsacueneyavayo ata, xua yabara itsajivi, Dioso pejumecovënëtsijivi, jamatabëcuenebijianaejitsipatsi,” bejamatabëjaiti. ¹⁴N ajamatabëcuenecopatajë xaniavaetsia vajatuxanenë Jesucristojavabelia. Nexata yapëtaniji Dioso tanetocopatsijava taxaenexa xua picani cujuna-vajë taxaejava Jesucristojavabelia tanajamatabëcuenecopatsivajënaeya. Itsiata meta itsanë Dioso pejumecovënëtsinë bajaraxua itsa xane, jamatabëjumaiti tsipae: “Dioso apo netocopatsi taxaenexa bajaraxua. Itsa xaejitsipajë, naneconitsipajë Diosojavabelia,” jamatabëjai tsipae. Nexata apo xae tsipae bajaraxua. ¹⁵Panijabananë itsa apo pexaenë jumapecataeya pexanaenëanëjavabelia perajutsiyajuvënëvi, pëtsa patsitaxaneme. Tsipaji paxamë itsa patsitaxaejitsipame jumapecataeya pexanaenëanëjavabelia perajutsiyajuvënëvi, panijabananë bepacasivajamatabëjiobi tsipae. Tsipaji panijabananë bepibisiacuenie patsitaexanaejitsipame itsa patsitaxaejitsipame jumapecataeya pexanaenëanëjavabelia perajutsiyajuvënëvi. Nexata jumapecataeya pexanaenëanëjavabelia perajutsiyajuvënëvi, panijabananë itsa patsitaxaejitsipame, nexata panijabananë asivaya apo pataemë tsipae. Tsipaji itsa pacajanitaejitsipa panexaejava jumapecataeya pexanaenëanëjavabelia perajutsiyajuvënëvi, nexata bajaraponë ata naxaejitsipa. Nexata Diosojavabelia bepenaneconitsinë nataejitsipa penaxaexae jumapecataeya pexanaenëanëjavabelia perajutsiyajuvënëvi. Panetsitaxaejava pejamatabëcueneta Diosovecua panenaxuabiaexanaeyaniva panijabananë, pëtsa patsitaxaneme jumapecataeya pexanaenëanëjavabelia perajutsiyajuvënëvi. Tsipaji rabaja vajatuxanenë Cristo sivatëpa bajaraponë ata pena-xuabiyaniva. ¹⁶Payapëtae atamë, xua picani xanepana paneexanaenexa, itsiata panijabananë itsa cujunava bajaraxua pexanaenexa, pëtsa patsitaexaneme. Tsipaji panijabananë pacataejitsipa pibisiacuenie bepaneexanaevi. ¹⁷Vaxaiti baja najamatabëcuenecopabatsi Cristojavabelia. Nexata jumecovënëtavanapatsi Dioso. Apo nacaitorobi vajanayanijobabiabinexa ëvajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamatabëcueneyëpaeya vajajinavanapaenexa. Nacaitorobanua jamatabëcuenenbarëyaya vajajinavanapaenexa Espíritu Santo vajanacatsijamatabëecaexae. ¹⁸Pajivi Dioso pijacuene tonacuene-baponapona, sivajamatabëcuenenbarëyatsi Dioso. Jivi ata xaniavaetsia yayiatanetsi.

¹⁹Xua Dioso nacayavenona vajajinavanapaenexa najamatabëcuene-jëpaeya, bajaraxua exanavanapaenatsi. Xua ata nacayavenona nama-taenetsia vajanajamatabëcuene asaëyaexanaenexa Diosojavabelia, bajaraxua ata exanavanapaenatsi. ²⁰Pëtsa patsitaxaneme xua panijabananë tane bepitavetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinë

Diosojavabelia nataejitsipa. Panexaejava pejamatabëcueneta, bajarapajivi Diosovecua pajopaeyaexanaejitsipame. Bajaraxuayaniva pëtsa patsitaxa-neme xua cujunava panijabananë. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananë taejitsipa bepibisiacuene panee-xanaejava itsa paxaejitsipame. ²¹ Bajaraxuata pëtsa paxaneme jumape-cataeya pexanaenëanëjavabelia perajutsiyajuvënëvi. Pëtsa papamenua piatanera paneaitajibianiva. Pëtsa paexanamenua itsacuenejava ata, xua pejamatabëcueneta panijabananë pajopaeyaexanaejitsipame Diosovecua. Pëtsa patsitaexaname xua panijabananë jamatabëcuene faefaenaeyaexanaejitsipatsi. ²² Itsa baja xaniavaetsia payapëtaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabëcuene copatsivajënaeya, saya pamoyamë tsane. Tsipaji Dioso yapëtane pacuenia panajamatabëxainame bajaraxua yabara. iBitso jamatabëcuenebarëya pajivi pexanabiabijava yabara jamatabëjumaitsi: “Dioso pitabarata aneonijibia toponaponajë,” jamatabëjai! ²³ Pajivi pijinia jamatabëjumaitsi ata: “Apo xanepanae tsipae taxaenexa bajaraxua,” jamatabëjai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tsipaji pijacuata najamatabëcuenebijianaejitsipa. Daxita pijinia xua yabara vaxaitsi jamatabëjumaitsi: “Dioso apo jitsipae vajaexanaenexa bajaraxua,” jamatabëjai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

Pacuenia becanaëjëtatsi vajabananë

vajajamatabëcueneyavenonaenexa yabara pelivaisi

15 ¹ Vaxaitsi ajamatabëcuenesaëtsi Dioso vajajumecovënëtsijava. Nexata beyavenonatsi pamonae abaxë jamatabëcuenefaefaena Dioso pejumecovënëtsijava. Pëtsa exanatsi vaxaitsi vajacuata vajanatojitsipaecuenia. ² Biji rajane caejivitsi canacujitsia becanaëjëtatsi vajabananë vajajamatabëcueneyavenonaenexa. Xua yabara vajabananë ajamatabëcuenesaëjitsia, bajaraxua betoexanavanapatsi vajabananë pejamatabëcuenevitsabinexa Diosojavabelia. ³ Tsipaji Cristo ata, ponë Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaitsi, Dioso pejumelivaisibaxutota tajëvelia jumaitsi mapacueniaje: “Pacuenia picani jivi xamë pibisiacuena jamatabëcabaracuaicuaijai, xanë nebaracuaicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaitsi. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumecovënëtsinexa, vajanacajamatabëcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi,

itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaitsi bajarapalivaisita vajanacacapanepaenexa. ⁵Itsacueneyavaxi yabara bajayajebi itsa nacajamatabëcueneëjëtaponaxa, nexata Dioso nacajamatabëcuene yavenonaponaxa. Nacajamatabëcuenea saëyaexanaponaxa bajayajebinxata ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapae-nexa Jesucristo papecatojitsipaecuenia. ⁶Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaitsimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

**Pacuenia apo judíovi ata pexanialivaisi tsipaebatsi
pecapanepaelivaisinexatsi yabara pelivaisi**

⁷Pajudíovinë, apo pajudíovi atamë, najëpaeya Cristo nacapita pijajivinexatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yayiataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsipaji pijajivi yavenona xaniavaetsia petojinavanapaenexatsi,” jai tsabiabi tsane. ⁸Mara pacajumaitsijsije. Jesucristo athëbëvetsica patsica mapanacuayabetsicaje peyavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaitsi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. ⁹Jesucristo athëbëvetsica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuene-nëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaitsijsiava, Dioso pejumelivaisibaxutota jumaitsi mapacueniaje:

Xanë tajamatabëcueneta, daxitanacuanëpijivi: “Diosomë,
bitso ayaijamatabëcuenenëmë,” cajai tsabiabi tsane.

Catonaxëanabiabiananua vajianë ata,

jai Dioso pejumelivaisibaxutota paxa Diosojavabelia Cristo pejumaitsijsiava.

¹⁰Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaitsi mapacueniaje:

Apo pajudíovimë, pajamatabëcuenebarëyamëre Dioso pijajivi,
judíovi yajava,

jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹Itsabaxutota pijinia Dioso pejumelivaisibaxutota jumaitsi icatsia mapacueniaje:

Paxamë apo pajudíovimë, Diosojavabelia pajumaitsimëre: “Diosomë, bitso ayaijamatabëcuenenëmë,” pajamëre. Paxamë, padaxitamë, itsamonaejavabelia pajumaitsimëre: “Caenë Dioso bitso ayaijamatabëcuenenë,” pajamëre,

jai Dioso pejumelivaisibaxutota.

¹² Isaíaspijinë pijinia itsabaxutota tajëvelia yaquina Jesucristo pelivaisi. Jumaitsi mapacueniajê:

Penacuetonëyo naexanaena. Nexata Isaípijinë bepemomonëyocuenia naexanaena. Itsa vitsabiana, Dioso evetsiaexanaenatsi jivi, daxitanacuanëpijivi. Pamonaë apo judíovi, jumecovënëtsiana bajaraponë pesivatëpaejavatsi pecapanepaenexatsi pijaneconivecua,

jai tajëvelia Isaíaspijinë peyaquinaebaxutota Jesucristo yabara.

¹³ Yapëtanetsi Dioso vajanacapanepaejavanexa Jesucristo pejamatabëcueneta. Nexata pacatovajëtatsi Dioso papecajamatabëcuene barëya-yaexanaenexa. Pacatovajëtatsinua jamatabëcuenexanepanaeya panejivanapanaenexa. Bajarapacuenia Dioso pacajamatabëcueneyavenonaena tsipaji Dioso pajumecovënëtame. Espíritu Santo ata, ponë pacatsijamatabëeca, pesaëta panevajënaeyabelia pacajamatabëcuene asaëyaexanaponaena Dioso papecacapanepaejavabelianexa.

¹⁴ Tajamonae, pacayapëtanetsi paxamë papexaniajamatabëcuenevijavamë. Pacayapëtanetsinua paxamë bitso paneyapëtaejava Cristo papecasivatëpaejava pibisiacuene paneexanaeoneconí yabara. Pacayapëtanetsinua paneyapëtaejava xaniavaetsia namataenetsia panenamuxujiobinexa.

¹⁵ Tajamonae, palivaisi baja payapëtaneme, bajarapayajuvënëlivaisi panenajamatabënapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonënexanë Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajë pexanialivaisi, Jesucristo pelivaisi, pecapanepaelivaisinexatsi Diosojavabelia. Espíritu Santo pejamatabëcueneta apo judíovi ata Cristo pijajivi exanatsi. Bajaraxuata Dioso sivabarëyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonëxaenë, Jesucristo neyavenonabiaba itsa tona-cuenebabiabajë. Bajaraxuata barëyanë tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso.

¹⁸ Rovialia tsipaebabiabajë ajumeurajibia. Tsipaebabiabajë vajatuxanenë Jesucristo taneyavenonabiabijava tatonacuenebinexa Dioso. Vajatuxanenë Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovënëtsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaëta pinijicue-ne taexanaponaejavanë, bajarapamonae jumecovënëta baja Jesucristo

pesivatëpaejavatsi pibisiacuene pexanaeneconi yabara. ¹⁹Vajatuxanenë Dioso pesaëta nejamatabëcuenecaëjëpaeyaexana pinijicuene taexanae-nexa. Espíritu Santo ata pesaëta nejamatabëcueneyavenona. Bajaraxuata apo judíovi tsipaebaponajë pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponajë baja bajarapalivaisi Jerusalén tomarajava. Bajaraxuacujinae tsipaebaponajë daitanacuanëjava. Tajënacujavabelia ata, Ilírico nacujavabelia, tsipaebaponajë. ²⁰Itsa tsipaebaponajë pexanialivaisi, Jesucristo pelivaisi, jitsipajë tatsipae-baponaenexa itsaxuayo abaxë jivi apo vënëlivaisitae Cristo. Apo jitsipae-në tatsipaebaponaejava itsaxuayo baja tavajënaeya itsamonae tsipaebapona. ²¹Bajarapacuenia apo judíovi itsa tsipaebaponajë Jesucristo pelivaisi, copiapata jane baja pacuenia baja cajena Dioso pejumelivaisibaxutota tajëvelia jumaitsi tatsipaebaponaejavanexa yabara. Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajëvelia jumaitsi mapacueniajaje:

Pamonae abaxë apo vënëlivaisitae, ponë athëbëvetsica Dioso itorobijitsitsica jivi pecapanepaenexa, bajarapamonae bajaraponë pelivaisi tsipaebianatsi. Nexata bajarapamonae jumecovënëtsiana ponë pelivaisi tsipaebianatsi,

jai tajëvelia Dioso pejumelivaisibaxutota Dioso pitorobinëtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabëponabiaba

Roma tomarabelia yabara pelivaisi

²²Bajayajebi picani bitso jamatabëpacataeyabiabatsi. Itsiata apo necuenecaëjëpae taponaeenexa paxamëjavabelia daitanacuanëjava Dioso pejumelivaisi tatsipaebanajetarucaexae. ²³Aeconoxae baja veretajë tana-cuenebijava mapanacuajavaje. Nexata jane baja ponaenajë paxamëjavabelia. Tsipaji picani bajayajebi jamatabëpacataeyabiabatsi. ²⁴Pamatacabi ponaenajë España nacuyabelia, patsianajë copiaya paxamëjavata patac-taenexa. Itsa baja nataenatsi, bitso jamatabëcuenebarëya tsavanapae tsanetsi. Bajaraxuacujinae jitsipajë pataneyavenonaenexamë tajanamutonexa taponaeenexa jane baja España nacuyabelia. ²⁵Bajara masaya pamatacabitaje ponaenajë Jerusalén tomarabelia ofrenda tatocaponaenexa Dioso pejumecovënëtsivi. ²⁶Dioso pejumecovënëtsivi, Macedonia nacupijivi, Acaya nacupijivi ata, ofrenda baja toexana. Bajarapaofrenda toexana petoitorobinexa Dioso pejumecovënëtsivi, pamonae bepejiobivi, Jerusalén tomarata pejinavanapaeivi. ²⁷Macedonia nacupijivi, Acaya nacupijivi ata, apo judíovi. Itsiata tsitaxanepanatsi bajarapacuenia ofrenda petoexa-naenexa peyavenonaenexa juya judíovijavabelia, Jerusalén tomarapijivi. Tsipaji judíovi copiaya yapëtane pexanialivaisi pecapanepaelivaisine-xatsi Diosojavabelia. Nexata judíovi pejamatabëcueneta, pamonae apo

judíovi ata, yapètane baja pecapanepaelivaisinexatsi Diosojavabelia. Bajaraxuata pamonaē apo judíovi beyavenona juya judíovijavabelia. Judíoviyajuvèñēvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸Copiaya tocalianè tsane mapaofreundaje Jerusalén tomarapijivijavabelia. Nexata bajaraxuacujinae itsa ponaenajè España nacuayabelia, copiaya patsianajè paxamèjavata. ²⁹Itsa patsianajè paxamèjavabelia, orijibia pacatsipaebianatsi pexaniali-vaisi, Cristo pelivaisi, bitso panejamatabècuenebarèyanexa.

³⁰Tajamonae, pajumecovèñètame vajatuxanenè Jesucristo. Paneasivamènuā Espíritu Santo pejamatabècueneta papecajamatabè-cueneitorobixae pataniasivanexamè. Bajaraxuata pexaniacuene paca-vajètatsi. Itsa pavajètame Diosojavabelia, xanè ata asaèyata panetova-jètsianame, pacuenia tajacuata natovajètabiabajè. ³¹Panetovajètsiana me Diosojavabelia taneyavenonaenexa taneitsacueniabiyaniva Judea nacuapijivi, Dioso apo pejumecovèñètsivi. Panetovajètsianamenua Dioso pejumecovèñètsivi, Jerusalén tomarapijivi, tanevecuapitsinexa xaniavae-tsia paofrenda tocaponaejitsianè. Pamonaē apo judíovi pejebipalataxae, belia bajarapaofrenda apo nevecuapitsi tsipae bajarapamonae judíovi. ³²Panetovajètsianamenua, itsa Dioso jitsipa, barèyaya tapatsinexa paxamè-javabelia. Panetovajètsianamenua tanejamatabècuene asaèyaexanaenexa Diosojavabelia itsa ponaponajè paxamèjavata. ³³Xanè pacatovajètabiabatsi Diosojavabelia papecayajavaponaponaeenexa Dioso. Dioso cajena nacayavenonabiaba jamatabècuenebarèyaya vajajinavanapaenexa. Bajara itsi tsane.

**Pacuenia Pablo jamatabènajinalia peyapètaevitsi,
Roma tomarapijivi, yabara pelivaisi**

16 ¹Payavenonaename vajabanava Febe, pova ponaejitsia paxamè-javabelia. Bajarapova yavenonabiaba Dioso pejumecovèñètsivi, Cencrea tomarapijivi. ²Pacopiapitsianame xaniavaetsia bajarapova vajatuxanenè Jesucristo pejamatabècueneta, pacuenia vaxaitsi copiapitabiabatsi Dioso vajanajuajumecovèñètsivi. Xua namatavenona bajarapova, payavenonaename. Tsipaji bajarapova yavenonabiaba ayaibitsaèto Dioso pejumecovèñètsivi. Xanè ata neyavenonabiaba.

³Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebijivibeje vajatuxanenè Jesucristo pijacuene. ⁴Bajarapajivibeje toayai atatsibeje petèpaejavanexabeje picani, necapanepabeje tatèpaejavaminexavecuā. Nexata jumaitsinè: “Pexaniacuene baja cajena bitso panetoexanamebeje,” janè bajarapajivibejejavabelia. Itsiata èxanè bajarapacuenia apo jumaitsinè. Daxita pamonaē apo judíovi, Dioso pejumecovèñètsivi, bajarapamonae ata, bajarapacuenia jumaitsitsibeje tanecapanepaexaēbeje. ⁵Pamonaē Dioso

pejumecovënëtsivi, pamonaē nacaetuatabiaba Priscabeje Aquilabeje pijabota, bajarapamonaē ata nebajacobiana. Nebajacobiananua tasi-
vanē Epeneto. Bajaraponē daxita Asiavënë nacuapijivivecua copia-
ya najamatabēcuenecopata Jesucristojavabelia. ⁶Nebajacobiananua
María, pova bitso tonacuenebabiaba Dioso pijacuene paxamē tuatuajēta.
⁷Nebajacobiananua tajanacuapijinēbeje, Andrónicobeje Juniasvënëñēbeje.
Bajayata bajaraponēbeje panenajuajeba penaneconitsivi pejebabiabibota.
Bajaraponēbeje yaiyataeya baracuaicuaijaitsibeje pevëna apóstolevi ata.
Xanē ata tanajamatabēcuenecopatsivajënaeya, bajaraponēbeje najamata-
bēcuenecopatabeje Cristojavabelia.

⁸Nebajacobiananua Ampliato. Bitso tasivanē. Tsipaji bajaraponē ata
Cristojavabelia najamatabēcuenecopata. ⁹Nebajacobiananua Urbano.
Bajaraponē ata tonacuenebaponapona vajatuxanenē Jesucristo pija-
cuene pacuenia vaxaitsi tonacuenebavanapatsi. Nebajacobiananua
Estaquis, bitso tasivanē. ¹⁰Nebajacobiananua Apeles, ponē picani dova-
thi pejamatabēcueneta jamatabēcueneējëtatsi Cristo pelivaisi pejume-
covënëtsijava yabara. Itsiata apo copatsi pejumecovënëtsijava Cristo
pelivaisi. Nebajacobiananua Aristóbulo pijamonaē. ¹¹Nebajacobiana
nua tajanacuapijinē Herodión. Nebajacobiananua Narciso pijamonaē,
pamonaē penajamatabēcopatsivi Cristojavabelia. ¹²Nebajacobiananu
a Trifenabeje Trifosabeje, povabeje tonacuenebabiaba Dioso pijacuene.
Nebajacobiananua vajaasivava Pérsida, pova bitso tonacuenebabiaba
Dioso pijacuene. ¹³Nebajacobiananua Rufo, ponē bitso xaniavaetsia jume-
covënëta vajatuxanenē. Bajaraponē pena ata nebajacobiana. Bajarapova
bepexënatonē netaeyabiaba. ¹⁴Nebajacobiananua Asíncrito, Flegonte ata,
Hermas ata, Patrobas ata, Hermes ata, itsamonaē ata, pamonaē najinava-
napa bajarapamonaējavata. ¹⁵Nebajacobiananua Filólogo, Julia ata, Nereo
ata, Nereo pejuyapijiva ata, Olimpás ata, daxita itsamonaē ata, Dioso
pejumecovënëtsivi, pamonaē najinavanapa bajarapamonaējavata.

¹⁶Paxamē ata Dioso panejumecovënëtsixae, xaniavaetsia namataenetsia
bitso nasivaya panabajacobabiabare. Daxita pina Dioso pejumecovënëtsivi
majotaje pejinavanapaevi pacabajacobalia.

¹⁷Tajamonaē, pacatsipaebatsi itsalivaisi. Penajumetsënëtsilivaisi
petsipaebaponaēvi, panayajivitaename papecayamaxëitojorobiyaniva.
Bajarapamonaē namataenetsia pacanajumeanaenotsiaexanaena najama-
tabēcuenejēpaeya panejinavanapaeyaniva panenavecuansanaenexa.
Palivaisi baja paxamē pajumecovënëtame, bajarapalivaisivecua saica-
yalivaisi bajarapamonaē tsipaebapona. Panavecuatsare bajarapamonaē.
¹⁸Bajarapamonaē apo jamatabēexanaē pacuenia jitsipa vajatuxanenē
Jesucristo. Biji rajane saya jamatabēexana bajarapamonaē pijacuata pena-
tojitsipaecuenia. Bajarapamonaē jivi tsipaebapona bepexaniajailivaisi
itajara. Itsiata baitsi jane bajarapamonaē saya jamatabēyamaxëitojoroba

pamonae abaxë xaniavaetsia apo jumeyapëtae pexaniajailivaisi.

¹⁹Daxitajivi paxamë pacavënëlivaisitane xaniavaetsia panejumecovënëtsi-
java Dioso. Bajaraxuata pacasivabarëyatsi. Pacatojitsipatsi paneyapëtae-
nexa bitso ëpexaniacuene paneexanaenexa. Pëtsa panacopatame itsajivi
ata papecayamaxëitojorobinexa pibisiacuene paneexanaenexa. ²⁰Dioso
baja cajena vajanacayavenonaenë najamatabëcuenejëpaeya vajajinavana-
paenexa, itsajivi ata vajanacayamaxëitojorobiyaniva penajumetsënëtsili-
vaisita. Nexata Dioso bepijia pacayavenonaena panejamatabëcueneamo-
neyabinexa dovathi. Pacatovajëtabiabatsi Diosojavabelia vajatuxanenë
Jesucristo papecayavenonabiabinexa.

²¹Pabajacobianame pina Timoteo, Dioso patatonajuanacuenebinëbeje.
Pabajacobianamenua pina tajanacuapijivi Lucio, Jasón ata, Sosípatér ata.

²²Xanë, Tercionë, mapabaxutotaje Pablo pijume tajumeyaquina-
ponaenë. Xanë ata pacajamatabënajinatsi. Tsipaji Jesucristojavabelia
vajanajamatabëcuenecopatsivi.

²³Pabajacobianame pina Gayo. Naponaponajë Gayo pijabota. Gayo
tocopatabiaba daxita Dioso pejumecovënëtsivi penacaetuatabiabinexa
Gayo pijabota. Pabajacobianamenua pina Erasto, ponë evetabiaba palata,
Corinto tomarapijipalata. Pabajacobianamenua pina vajabananë Cuarto.

²⁴Pacatovajëtabiabatsi Diosojavabelia daxita paxamë vajatuxanenë
Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵Vaxaitsi Dioso yabara jumaitsitsi tsabiabi: “Dioso cajena bitso ayai-
jamatabëcuenenë,” jaitsi tsabiabi. Dioso, daxitamatacabijavabelianexa
peponaponaenë, caëjëpatsi papecajamatabëcuene asaëyaexanaenexa peju-
melivaisita. Bajarapalivaisi pexanialivaisi, Jesucristo pelivaisi, jivi peca-
panepaelivaisinexatsi Diosojavabelia. Bajarapalivaisi jivi tsipaebaponajë.
Bajarapalivaisi bajayajebi picani Dioso muetsia xainabuata. Dioso nacua
pexanaejavaveliacujinae, muetsia Dioso xainabuata Jesucristo pelivai-
si. ²⁶Bajarapalivaisi bajayata Diosojumelivaisipaebivi profetavi tajëvelia
yapëtane baja cajena. Nexata bajarapalivaisi profetavi yaquina. Nexata
bajarapalivaisi mapamatacabitaje Dioso jane baja nacayapëtaeyaxana.
Nexata Dioso pijajivi itorobapona daxitanacuanëpijivijava petsipaebinexa
Jesucristo pelivaisi. Bajarapacuenia Dioso pijajivi itorobapona daxitana-
cuanëpijivi ata pejumecovënëtsinexa Jesucristo pelivaisi.

²⁷iCaenë rabaja Dioso daxitacuene peyapëtaenë! Bajaraxuata daxitama-
tacabijavabelianexa vaxaitsi vajatuxanenë Jesucristo pejamatabëcueneta
Diosojavabelia jumaitsitsi tsabiabi: “iDiosomë, bitso ayaijamatabëcuene-
nëmë!” jaitsi tsabiabi. Bajara itsi tsane.